



15  
1301  
10





門 5  
號 1301  
卷 10

唐文拾遺卷之二十八

榮祿大夫三品頂戴前分巡廣東高廉道加四級臣陸心源輯

趙全泰

全泰敬宗時承務郎攝易州滿城令

唐承務郎前試左武衛兵曹參軍攝易州滿城

縣令趙全泰妻沛郡武氏墓記

夫人姓武常山眞定人也其先宋武公後遷沛郡流  
芳散莽得地皆榮祖顏皇趙州司馬父諫皇冀州司  
倉叅軍簪冕承家琳瑯繼世夫人卽司倉之幼女也  
恭守先訓爲婦柔和內撫遺孤外睦親眷其於孝行

昭和十年  
二月十四日  
購求



卷二十八  
難以具陳以窳麻元年七月廿一日卒於定州深澤  
縣之官舍享年卅有六嗚呼哀哉有兒女五人卅雉  
相次哀號一絕悲感四隣卽以其年十月十六日遷  
窆於定州西南卅五里新樂縣仁義鄉之原祔於先  
塋礼也全泰官移此州纔餘一月旋聞疾困醫禱無  
徵顧命之時後事無託關河阻遠奔赴不及痛一朝  
而永隔重泉感平生而撫棺慟哭慮陵谷變遷刻石  
紀其年代也

常山貞  
石志

符載

全唐文六百八十八有傳

亡妻李氏墓誌銘 并叙

夫人姓李氏其流派出於天漢之一枝矣衛尉卿昇  
之孫吏部尚書曷之堂姪孫房州刺史逞之女凡婦  
之柔嘉茂淑組紉應對之事夫人備有焉加以敬恭  
長上誘納卑薄情禮周洽六姻睦然風韻孤遠不嬰  
常態中饋酒食外彈雅琴詠古詩鄙人褊吝陰有助  
不幸反落春秋三十六以貞元十一年三月十二日  
疾卒于尋陽是年四月廿一日權窆于德化鄉之北  
嶺元和七年八月七日載上天降禍荐丁豐罰扶護  
靈櫬歸於鳳翔回得啟發祔于皇先姑之側禮也嗚



呼生展于敬養歿葬於舊鄉上不愧于三光下不畏  
于九泉可謂始終婦道無罪悔矣男曰匡儒女曰上  
清子攀號不遂哀纏茶蓼引農楊夫人育之於顧復  
訓之於教義幾乎成立莫知所自庶足以慰幽魂焉  
銘曰

浮江沂漢歸舊鄉已方申穴掩玄堂千秋萬歲安未

央石

薛存誠

全唐文六百九十三有傳

御史推勘不限東西奏

當司應受事推勘等臺中舊例及興元元年十月四  
日御史大夫崔縱重奏取侍御史殿中侍御史各二  
人共成四推猶以東西推爲名又各分京城諸司及  
道州府爲東西之限隻日則臺院受事隻日則殿院  
受事其中一人有故則同推便知者伏以所分諸司  
及府州爲限已定事若併至無例均分劇者則推鞠  
難精閑者則吏能莫試今請不以東西爲限亦不以  
取隻日隻日受事但請依舊請四推御史令輪環受  
事周而復始如此則才用俱展勞逸必均其餘應緣  
推事須有約勒若一一聞奏慮煩聖聽勅下後請隨



事條流

唐會要  
六十二

薛平

全唐文六百九十三有傳

禁掠賣新羅人口奏

應有海賊掠新羅良口將到當管登萊州界及緣海諸道賣爲奴婢者伏以新羅國雖是外夷常稟正朔朝貢不絕與內地無殊其百姓良口等常被海賊掠賣於理實難先有制敕禁斷緣當管久陷賊中承前不守法度自收復已來道路無阻遞相販鬻其弊尤深伏乞特降明勅起今已後緣海諸道應有上件賊

並賣新羅國良人等一切禁斷請所在觀察使嚴加

捉搦如有違犯便準法斷

唐會要  
八十六

高元裕

全唐文六百九十四有傳

丞郎拜食先牒臺司奏

伏以近日丞郎以上官未就食之前時有稱疾便請先出請自今合候對官遇延英開日有事要與宰臣商量者卽請拜食後先出仍事須前牒臺司或年齒衰遲不任每度就食者量許三度仗下後先出其餘官不在此限如違請每月終一度具名聞奏

唐會要  
二十五



李夷簡

全唐文六百九十四有傳

憲宗稱祖奏

王者祖有功宗有德大行皇帝戡剪寇逆累有武功  
廟號合稱祖陛下宜當決在宸斷無信讒說書生也  
唐會要十五

彈奏舉選限內請朝參奏

淮貞元十二年四月中丞王顏元和元年三月中丞  
武元衡奏兵部吏部禮部侍郎官每年舉選限內不  
奉朝參又今年所造選格不詳勅文復請明日朝參

臣合彈奏

唐會要二十四

訪察諸道不法奏

諸使諸州有兩稅外雜率及違格勅不法事請諸道  
鹽鐵轉運度支巡院訪察狀報臺司以憑聞奏  
冊府五百六十六

李紳

全唐文六百九十四有傳

唐故試太常寺奉禮郎趙郡李府君墓誌文  
府君諱繼字興嗣晉陵府君口長子先口人裴氏出  
也府君娶博陵口絳字缺四壽六十一以元和口年三



月缺四常州無錫縣寓居缺八至十口年秋七月廿

有缺五奉歸于長口百鹿原陪缺五君瑩之後七

十六步冬十一月缺五嗚呼先兄有文學缺八不仁

又絕其嗣有缺九猶室嗚呼紳遠自淮缺七淚面而

東之諸侯口為口事遠缺四可恨者崔媿以信丁巫

神不護靈旄口為痛哉敢誌於石用告幽壤謹誌

博陵不義不順不奔不譏明神有知終不得石刻

李德裕

全唐文六百九十六有傳

奏回鶻事宜狀

右臣等見楊觀說緣回鶻赤心下兵馬多散在山北

恐與奚契丹室韋同邀截可汗所以未敢遠去今因

華封迴輿望賜仲武詔令差明辨識事宜軍將至奚

契丹等部落諭以朝旨緣回鶻曾忠效又因殘破歸

附國家朝廷事體須有存恤令奚契丹等與其同力

討除赤心下散卒遣可汗漸出漢界免有滯留如蒙

允許望付翰林約此意撰詔兼詔克恭未審影宋本

集品

請發陳許軍馬狀

右臣等商量賊中人心久合自變猶恐願望河朔旬



月偷安陳許累有戰功軍聲甚振王宰年力方壯才  
略可稱委之征行必有殊效非惟破賊積之膽足以  
堅鎮魏之心倘有先聲必當自潰望詔王宰自揀當  
軍馬步精兵除合留在鎮外並取河陽相衛路直抵  
磁州其在鎮兵馬委行敏權知仍差幹事判官一人  
留務未審會昌三年八月十一日同  
賜王宰詔意用兵之難在於過險既收要害便合成功故出井陘而趙師虜過成臯而吳寇殄得略陽而隴坻服入大峴而廣固平近則破鹿頭而翦蜀克郾城而定蔡卿

初取天井大振威聲皆謂計日而取澤州指期而擒  
劉稹頓兵危坂已涉二時日費殆過於千金途隘有  
逾於九折士不宿飽人已告勞在朝公卿繼陳讜論  
皆云卿之血屬質在賊中此一人之常情固當無隱  
昔樂羊食子文侯見疑愛既及於懿親義豈後於君  
上若慮危害晏實未忍急攻但卿披誠朕必深恕卽  
當與卿移鎮必使兩全如能大義滅親至誠體國捨  
爾所愛建茲殊勲繼先王鐘鼎之榮傳子孫帶礪之  
慶卽須厭塞公議早覆妖巢朕之報卿必異羣帥暑  
潦將至農事已興偃武息人固難淹久深思朕意勿



更食言又知卿比留支兵守備萬善既分武力尤費  
機謀今授劉沔河陽日臨寇境俾爲聲援常據要衝  
卿既進攻必無後慮勉當協力副朕至懷同  
答侍郎十九弟書

天地窮人物情所棄雖有骨肉亦無音書平生舊知  
無復弔問閣老至仁念舊再降專人兼賜衣服器物  
茶藥至多開緘發紙涕咽難勝大海之中無人拯恤  
資儲蕩盡家事一空百口嗷然往往絕食塊獨窮悴  
終日若饑唯恨垂沒之年須作餒而之鬼十月末伏  
枕七旬藥物陳裒又無醫人委命信天幸而自活聞

十一月二十日從表兄崖州司戶叅軍同正李德裕

狀侍郎十九弟

洪邁容齋續筆

遺段少常成式書

自到崖州幸且頑健居人多養鷄往往飛入官舍今  
且作祝鷄翁爾謹狀北夢瑣言

李渤

全唐文七百十二有傳

創置理匭使奏

伏準寶應元年五月勅給事中韓賞中書舍人楊綰  
同充理匭使其時二人奏大理評事盧翰充判官又



準六典匭使常以御史中丞及侍御史爲之臺中人  
吏強幹首列百司明勅特并入匭實同創置其官吏  
手力食料紙筆委本司條流聞奏

唐會要  
五十五

李聽

全唐文七百十三有傳

募馬備邊奏

請於淮南忠武武寧等道防秋兵中取三千人衣賜  
月糧賜當道自召募一千五百人馬驍勇者以備邊  
仍令五十人爲一社每一馬死社人共補之馬永無

闕

唐會要  
七十二

胡季良

全唐文七百十三有傳

方山寶幢贊

并序

義不口國非忠也福不普緣非教也會昌口口年立  
幢大居士陳君曰常進口處居家不口三界

缺四字

口生靈口僧白僧岳內閔菩薩外現聲聞建立寶幢  
福延成性以此教救善住口遠口入口入菩提之門  
今以淨願立存存之口誠口致口口之福也良工周  
氏口口立后沓花臺勢轟梵史祇口口戶叨成也贊  
曰



文殊取經大帝宏教文德武功惟忠惟孝開張修相  
闡口門要龍華口期口福口妙石刻

德本寺碑

按此文見陶宗儀古刻叢鈔題胡季良纂談  
鑰吳興志亦云德本寺碑胡季良撰與全唐  
文九百九十闕名之文大略相同惟立君之  
立叢鈔作邱必無其跡之無叢鈔作垂達於  
所亡之亡叢鈔作止落澗上叢鈔有同字永  
躅下叢鈔有其石路與石橋之名相次不朽  
二句餘皆同所據當別一本今存其目文不

錄

柳公權

全唐文七百十三有傳

尊毆卑議

尊毆卑非鬪也且其子在以妻而戮其母非教也南

新書

筆偈

圓如錐捺如鑿只得入不得卻義是一毛出即不堪

用上同

聖慈帖



聖慈允許守官稍減罪責猶深憂懼續冀面言不一  
一誠懸呈卅第處十四日敬空

伏審帖

伏審姊姊八月定發第與廿八弟同從行遠聞不勝  
抃躍今日元七來望第速到極也願在路諮問不停  
滯幸甚未卽展豁尙增悵悵不一一公權呈廿三第  
廿六第廿八第卅第處卅一第意不殊前要小楷後  
使送往空

赤箭帖

奉榮示承已上訖惟增慶悅下情但多欣愜垂情問  
以所要悚荷難任儻有赤箭時寄及三五兩以扶衰  
病便是厚惠不具公權狀白

辱問帖

辱問卻道及碑本兼虛獎逾涯但深反側因見趙張  
如虛獎之說爲緣飾也幸甚不具公權呈

並清化閣帖

時新帖

爪一顆時新第一割而嘗之味又甘好以表汝之孝  
也明後至彼不悉耶告卅四娘省

汝帖

年衰帖

公權年衰才劣昨蒙恩放出翰林守以閑冷親情屬



卷二十八  
託誰肯爲響應惟深察公權敬白

同上

蘭亭帖

張蘭亭詩兼公權續得者亦坳上伏維檢領入篋餘  
冀面話不次十一日公權狀上給事閣老閣下青標  
輒換卻舊者謹空

蘭亭續帖

題王大令送梨帖

因太宗書卷首見此兩行十字遂連此卷末若珠還  
合浦劍入延平大和二年三月十日司封員外郎柳

公權記

三希堂帖

謝人惠筆書

近蒙寄筆雖毫管甚佳而出鋒太短傷于勁硬所要  
優柔出鋒須長擇毫須細管不在大副切須齊副齊  
則波擊有憑管小則運動省力毛細則點畫無失鋒  
長則洪潤自由頃年曾得舒州青練筆指揮教示頗  
有靈性後有管小鋒長者望惠一一卽爲妙矣

天中記

吳臯

臯憲穆間臺史

按當爲盧坦官監察時御史臺令史有謂臺史卽今所謂屬吏者疑非

爲盧坦紀事銘

盧坦爲河南尉時杜黃裳爲尹然以受餉見疵也召  
坦立堂下曰某家子與惡人游破產盍察之坦曰凡



卷二十一  
三  
居官廉雖大臣無厚蓄其能積財者必剝下以致之  
如子孫善守是天富不道之家如不善守必恣其不  
道以歸於人黃裳驚其言自是遇加厚臺史感而銘  
曰 有燦者物有悚者欲投之而迷才也罔束維後  
之艱維身之戮垢業廼盈冥數廼肅嗟彼嫩人朗焉  
如浴識與天諧動與義屬利奚以乘害奚以局斷帶  
齊瑩作癩比壽藏絲並暉受魚擬辱玉壺澄姿水輪  
逸躅子孫爾昌福祿爾足聞則憚心見則駭目我欲  
行之烟誠是躅十二硯齋金石錄

韋辭

全唐文七百十七有傳

請停權麴奏

前使王公亮奏請權麴收其贏利將大上供臣到州  
察訪自停加配閭里稍安人戶逃者亦漸歸復但藏  
挾頗易挂陷頗多兼當州土宜少有麴麥州司遠處  
求糴般運甚難伏請卻停權麴任商旅將至當州州  
司准權酒元勅及洪州鄂州流例於州縣津市官酤  
以代人戶配額冊府五  
百四

崔元略

全唐文七百十七有傳



軍使追人令移文牒奏

諸司諸軍諸使追府縣人吏所由及百姓等比來府縣除賊盜外所有推勘公事相關者皆行公牒近日多不行文牒率自擒捉禁繫之後府縣方知其中人吏所由亦有姦猾為無憑據妄生推枉又難辨明其百姓等聽被追捕緣無公牒多加怨動致有逃匿今後望降勅旨應請諸軍諸使要追府縣人吏百姓等非盜賊外並令行移文牒所冀官曹免相侵擾

唐會要六

李珏

全唐文七百二十有傳

徐行周五代同居奏

廬州舒縣太平鄉百姓徐行周叔姪兄弟五代同居

請免其同籍戶稅

冊府四百九十一

華景洞題名

郴州刺史李珏桂管都防禦巡官試秘書省校書郎元允□會昌五年五月二十六日同遊時珏蒙恩移郡之任桂陽校書以京國之舊邀引尋勝男前京兆府參軍階進士潛譜楷從行

廣西通志

韋絢



全唐文七百二十有傳

戎幕閒談序

贊皇公博物好奇尤善話古今異事當鎮蜀時資佐  
宣吐壘壘不知倦焉乃語絢曰能隨而紀之亦足以  
資於聞見絢遂操觚錄之號為戎幕閒談太和五年  
十一月二十三日巡官韋絢引本書

藏諸

諸文宗朝人

菖蒲澗記

菖蒲澗澗多菖蒲因名之自潭北入澗行經此新開

路東轉不啻一百步其間巨石疊倚嘉木交暎嵌空  
森聳竒勢異狀綠苔青蒲印搭履跡捫手探足無非  
蒼翠幽禽欣欣飛泉潺潺若有羽人僊客鼓瑟吹簫  
於洞穴之中繇是使人心逸神暢恍然忘歸斯實方  
外靈邃之佳賞也噫自有此澗杳無人蹤豈異夫浮  
世之事通塞亦有時耶今鑿崖為路梯石為徑連延  
抵于碧巖盤石之東究其澗分之所巖石亦有鐫字  
開成四年十月廿三日武功男子藏諸記山房僧引

真同尋澗路金石苑

魏則之



則之文宗朝人朝散大夫試太子詹事兼監察御史

唐左神策軍護軍中尉副使兼左街功德副使

金紫光祿大夫右監門衛將軍上柱國高平

郡開國公食邑二千戶劉公故夫人宏農縣

君楊氏墓誌銘

并序

夫積慶者宜鍾乎介祉享祐者宜降以永年繆鑿若  
斯根源靡究然修短之分豈造次而踰焉嗟乎月墮  
仙娥星收婺彩花摧玉樹噫足悲哉夫人宏農楊氏  
諱挺字瓊華京兆長安縣人也曾祖待賓皇昭武校  
尉守綏州義合府折衝祖延祚皇任內飛龍廐都判

官寶應功臣太中大夫行內侍省內常侍上柱國賜  
紫金魚袋父惟良皇任華清宮使朝散大夫守內侍  
省內常侍上柱國賜緋魚袋皆簪組傳榮衣冠弈莽  
庸勲繼代諜譜詳諸夫人卽內常侍公之長女也坤  
靈毓質蘭晚挺姿性稟冲和量懷溫雅詩書瞻曹家  
之奧管絃精蔡氏之能婉嫵含貞宗族攸重三星始  
見百兩爰來年泊初笄適于高平劉公洪潤齊眉等  
貴合卺聯輝相敬如賓和鳴並耀日來月往卅餘載  
晨昏盥饋夙夜無違逮事舅姑益彰溫清因夫延寵  
疏邑顯榮石窳之封固無慙德繇是闈門鬱郁素履



彌芳壺範聿修彤管稱美宜乎永諧宮徵終契百年  
之歡樂往悲來旋徵二豎之夢膏肓有驗和扁無瘳  
沉痾連絲委愒臻極以大和四年六月十一日卒于  
輔興里之私第享齡五十有四粧奩遽閉香閣永辭  
逝水不迴奄歸長夜嗚呼哀哉瓊枝忽墜鸞鏡徒懸  
悼隔幽明痛深泉路兆卜先遠龜筮告從旌旒啟行  
輜輶就引卽以此年十月廿九日遷窆于鳳城西之  
龍首鄉龍首原禮也有子五人長曰仕仔子亭判官  
太中大夫行內侍省內府局丞上柱國高平縣開國  
男食邑三百戶次曰仕備朝議郎行漳王府叅軍上

柱國次曰仕侗中散大夫行內侍省內府局丞上柱  
國彭城縣開國子食邑五百戶次曰仕僚次曰仕份  
賜綠或趨馳禁掖或叅貳王曹或委質宮闈或優遊  
墳籍皆神形特立雋秀當時聲掩八龍價邁三虎茹  
荼叩地瘡毀苦廬泣血絕漿孝俸曾閱攀號不逮鴆  
慕岡依感切風泉哀纏骨髓恐川成峻岳山變洪波  
願刻貞珉庶旌盛烈銜悲見請竊愧謏才握管杼碎  
多慙漏略銘曰

易讚坤靈詩美嬪則婦道母儀柔從淑克行標茂範  
德播擇鄰事上盡敬撫下推仁宜昌百祿保壽千春



天胡不臧降禍茲辰宅兆何所鳳城西偏松檟云樹  
曉夕凝烟楊葉蕭蕭馬鬣危危芳塵漸遠朗月空垂  
刻石

睦畚

畚大和中人自號姑射處士

唐故試大理司直辛公墓誌銘

公諱幼昌字宏運其先隴西人曾父奉國開府儀同  
三司豐州刺史天德軍使兼御史大夫上柱國隴西  
郡蕭國公食邑三千戶贈工部尚書烈祖榮朔方節  
度副使□會都知兵馬使兼御史大夫平陽郡王食

實封一百五十戶父□持節通州諸軍事守通州刺

史兼御史中丞公累傳茂範藉振能名聰博機謩卓

然宏異始總□郡會嬉戲之際識者目落落之清姿

則駭謂固天縱也暨長□□□瀚墨樞缺十明示將

來缺四字荷□□□莫大之術者何罾金拖紫之崇貴

得不坐而至乎何伏波定遠之□爵得不俯而置乎

亦何俟矻矻伏膺然後爲學繇是六奇三略開闔襟

□每鳴弦架鏘遠近弛張謂古之破葉號猿今足當

仁矣公以業□簪組旌戟交輝固欲指掌青雲捧楊

白日仕進之廣路官學之多門□躡梯階式爲修立



授試大理司直□寄結僚友□追游孟仲芬葩芝蘭  
疊馥豈止趨庭申孝敬之則□節盡周旋之誠遠望  
前程熟究邊極豈其彼蒼者天修□無筭巨鱗既□  
煙溟勢窮以大和六年十二月廿五日卒于平陽郡  
之私館□□廿有七允子師周鶻駮未識熙怡詎悲  
零丁鴈行□□茶感且□中丞□□遷牧通川南北  
迢遙山川綿隔□家于□已歷歲時凶訃難飛鵲鴿  
增疾仲兄幼直等部辦儀具克叶龜從以明年三月  
廿七日□送歸附於京兆萬年縣三趙村東原之大  
塋禮也固恐桑田凌谷俄徙星霜庶撫□實憑不朽

而雕于石其辭云

命運罕知兮杳冥莫測□□建□兮殲我懿德不可  
贖兮永□□春閑元宮兮松柏爲隣續語堂  
碑錄

昔耘

耘大和中鄉貢進士

大唐故隴西郡李府君墓誌銘 并序

夫地稱膏壤迺生度用之材家號忠貞必育仁義之  
子蓋慶由善積氣自元深在諭物情其義一也府君  
諱琮字溫中先曰隴西人也門承台鼎代襲勲崇懿  
範令儀生而復稟謹飾挺立孤高莫儔爰自稚齡至



于羈歷抱瑚連之器有老成之風處榮蔭而不自  
媒爲貴允而心無所伐曾祖欽皇金紫光祿大夫左  
金吾衛大將軍贈太子太保雄名偉望迥冠古今祖  
晟皇開府儀同三司太尉兼中書令贈太師間傑之  
後特因時生匡國寧人事著貞元之世徇忠奉節名  
光圖閣之書父愨雲麾將軍前右龍武軍將軍知軍  
事稟靈祚胄挺器英枝韞忠略而候難以行寘謀猷  
而候時乃進府君飽聆教道足守義方未踰弱年兩  
覲銓選位官察職流輩無雙罄勤恪以務公途竭俸  
祿而資私養朋友歸美親族稱賢謂若寒松永固凌

霜之質翻如春槿旋飛不實之華傾自疾纏暨考莫  
救時大和八年二月一日終官于朝請卽行都水監  
丞雲騎尉廿有一何顏子促矣傅父保母哀無輟時  
恨存歿之有殊屬穿竇而獲曰誠有可載議刊刻焉  
遂命末才俾爲紀述以是年是月十五日墓于京兆  
府萬年縣甯安鄉杜光里庶年祀更易陵谷推移希  
播餘徽用銘於石其詞曰  
貴葉勳枝非爾迺誰挺生秀氣特稟英姿體抱冲和  
色踰謙敬宇蓋松寒肌膚玉淨中稱孝謹外伏敦良  
威儀自得行義潛彰千里之駒九秋之鶚方富於年



曷爲凋落原儀將設送禮斯陳黃壚日閑萬古千春  
續語堂  
碑錄

劉礎

礎大和時正議大夫檢校右散騎常侍兼光祿卿上  
柱國終鄜坊節度幽州盧龍節度使劉總之子

唐幽州節度衙前兵馬使王公夫人故隴西李

氏墓誌銘 并序

夫人諱元素其先隴西人也爰祖及父俱厭名位高  
尙不仕以從其心夫人四德克修五常無爽鄉黨重  
其孝隣里傳其行年口九適王公因家于幽州之幽



都縣與其娣姒偕事先姑夫人藝出自然孝秉天性  
及姑之病綿歷歲時夫人色不滿容行不正履飲食  
湯藥必致其誠裁縫繡畫必盡其力是以先夫人愛  
之重之不使離其側每謂所親曰我見此新婦則疾  
覺小瘳其敬順之至通於神明矣洎丁先夫人之禍  
亦以孝聞有男二人長曰從約次曰從禮有女一人  
早歸於礎元和之末穆宗纂位礎自幽州戍倅作牧  
南陽夫人愛女隨焉銜命西上旋屬口門長惡姻黨  
稱兵音書兩亡倏忽十載九秋明月不照別離之心  
三峽夜猿應識悲涼之思粵去年秋七月方達京邑



棄危疑之地登仁壽之鄉室家以和骨肉相保豈期  
百花林下未盡歡娛三春節中俄聞哭泣以大和六  
年二月廿有九日邁疾終于道政里之私第高年六  
十六屬纊之時精神不撓所有遺託其詞甚哀嗚呼  
夫人台二姓之好歷四紀于茲事夫稟梁鴻之婦道  
訓子法孟軻之母儀持家以正接下以慈命也不造  
德之何衰卽以其年五月八日歸葬於京兆府萬年  
縣龍首鄉成義里鳳栖原禮也雖音徽昭美已布於  
遐邇而陵谷更變或資於述作琢于貞石用紀遺芳  
乃爲銘曰

桃之夭夭灼灼其華彼美夫人宜其室家旣出李宗  
嫁爲王婦容止可觀進退可度唯靜唯默以貞以素  
誰謂年光忽如薤露成義之里鳳栖之崗寂寂墓門  
蕭蕭白楊身葬異國神游故鄉萬歲千秋德音不忘

石刻

賈文度

文度大和時人宣德郎守左春坊太子內直郎

唐故太府寺主簿弘農楊府君墓誌銘

公諱迥字居然其先引農人也纓冕不歇炳煥相聯  
雖曰四代五公其後益熾公曾大父玄珪任銀青光



卷二十八  
三  
祿大夫守工部尚書贈太子少保大父錡任銀青光祿大夫守衛尉卿駙馬都尉尚萬春公主贈太常卿父暉任中散大夫守光祿卿尚宜口縣主世秉懿德姻襲金枝初任文敬太子廟令奉蘋藻供祭口禮敬必誠嚴謹備至次任左監門衛胄曹參軍口而不固雅而應物克己復禮時然後言次任左威衛胄曹參軍性專靜內敏有幹局無口無爲化成於政次任河中府河東縣尉儉慎端默居官廉恪所口不過一扁而政行一邑次任太府寺主簿守位必敬臨事必口口不以悔愆改節爲權豪屈言府君有子二人長子

曰引次子口口訓以義方敦閱詩禮咸能被服文行時人稱公善誘善教何期口不福善以大和七年十月十七日寢疾終於延康里之私第享年五十有三吁公之沒也志負其願壽違其仁官屈其器君子口口嗟其口而哀其命嗚呼渭水東注時與之俱音光緬然何口口矣夫人秀谷縣主禮樂風操家之範也柔明孝慈天之質也口修采蘋之職口正家節楊氏之六姻肅九族睦實夫人是賴豈期脩短是歲十一月十日不勝其哀薨於靈側春秋二十有六後公廿三日而歿公之難弟前司農寺丞道涕血護喪痛失



雁序謹以歲次甲寅八月己卯朔廿四日壬寅遷公  
及夫人靈座合安厝於萬年縣高平鄉高望里附先  
塋之禮也猶懼人世陵谷之不可期故刻石誌之冀  
其名氏之攸遠也銘曰

瓊樹零落兮秋夜長金枝寂寞兮遺清芳永扃泉戶  
兮誠感傷天乎欲問兮徒蒼蒼石刻

崔鏐

鏐大和時人官闕無考嘗奉使三韓按唐書宰相世  
系表清河小房有鏐當陽尉

大唐故興元元從登仕郎守內侍省內侍伯員

外置同正員上柱國朱公故夫人天水郡趙  
氏墓誌銘 并序

崇高兮廣大之厚礚礚兮周流之遠浚源長派茂幹  
脩柯著于圖謀可得而言也夫人姓趙氏其先天水  
人逮乎晉室克纘威烈播揚芬馥歷世輝耀搢紳之  
盛著乎人文炳然昭彰備存簡冊夫人幼稟禮法長  
明詩訓閑惠詳雅實生之知及笄而歸于朱氏之門  
克承坤順之柔婉婉謙恭之美奉舅姑著雍和之稱  
睦娣姒有柔愛之儀垂範可以示後昆立程可以式  
九族加之以恭儉施惠愛人以禮慈和溫敬六親儀



形是宜克保室家永綏豐祿良時難再晝哭二十二  
年及茲從心專意內典以嗣子奉命雞林三歲然復  
疚心疾首六時禮念冥期祐助以福後肩果符神力  
保全以歸洎相見時悲倍於喜浹旬大夫寵命日隆  
自宮闈令拜閤門使中外相慶咸謂夫人冥求保助  
以致於斯旣契夙心吾無恨矣嗚呼方歡娛於色養  
遽見悲於夜泉夫人以大和八年四月十六日終于  
長安輔興里之私弟高年七十有五歸全之日遺命  
謂大夫曰汝忠於國又孝於家海外三年吾期重見  
於此盡矣更何恨焉啟手足親戚悲號皆若終身之

酷可謂生死之義備矣先府君元和七年卽世權窆  
于京兆長安縣龍門鄉石井村今以其年十一月十  
四日改卜新阡重安窆窆于承平鄉大嚴村合祔禮  
也嗣子朝政宮闈局令充閤門使克承家之景行著  
揮謙於士流文以飾身武資忠力一心匡主万里前  
途泣血熒熒杖然後起兩女長適濮陽吳氏先夫人  
二歲而卒次適彭城郡劉氏晝夜哭泣水漿不人行  
路感歎殆至毀性鏗嘗忝國命與大夫同赴三韓備  
聞夫人善德託以叙述不敢飾讓庶紀其梗槩其餘  
美烈固存乎女史刊于貞石以懼陵谷之變也銘曰



灼灼薜華皎皎如月既歸我里禮法斯設其一垂範體  
則用光婦德克奉舅姑亦展忠力其二永享豐祿宜其  
家良白日不駐青松已行其三哀哀嗣子崇崇高原冥  
冥長夜髣髴在焉其四隴隧新啟壽堂初開合祔神宮  
永安夜臺其五刻石

明援

援大和中儒林郎試左金吾衛長史上護軍

唐胡府君夫人朱氏墓誌銘

胡府君安定人其先分氏於舜曰胡公滿之後也綿  
歷載代英賢顯赫以元和十二年十一月四日十七

稔而終祖考名諱仕進文藻暨府君德行名節男婚  
女媾悉具前誌故略而不書夫人族望沛國累世因  
時播遷今爲江夏安陸人也曾祖大父載在家謀考  
諱壁游心物外守節巖阿志遂忘情不屑時務可謂  
耶園奇士聖代逸人焉夫人卽處士第一女也柔惠  
懿淑婉婉雍妍禮樂素諳女工夙解年及乎笄歸于  
府君琴瑟克諧澣濯示儉箕帚旣恭蘋蘩式潔閨門  
以睦宗族以和中濯府君之艱痛鵲枝之半折恨龍  
劍之偏沈撫膺盡哀秉心全節惻愴拳慕寒暑載移  
於戲吉凶倚伏幽微難明德禮彌高年齡忽落以大



和六年口寢疾明年正月十日終于江夏郡中和里之私第享年八十有二越二月廿口日合葬于黃鶴山之南原府君之瑩遵魯人之耐同皎日之詩禮也嗣子真等皆發刃受鋒觀材見寶孝心塞乎天地而橫乎四海豈止於泣血終喪感深殞絕而已哉以援曾預嚴親之友奉命述其盛德云銘曰

嶄巖黃鶴峰巒旁薄邈迤南岡形勝北翔合耐舊域威儀不忒猗那夫人德禮難倫閨壺朗徹松筠表節地久天長桂馥蘭芳桑田變海貞石不改

古誌石華



唐文拾遺卷之二十九

榮祿大夫三品頂戴前分巡廣東高廉道加四級臣陸心源輯

李父

父武陽人開成間鄉貢進士按與全唐文二百六十

六李父別

唐故處士潁川陳氏公墓誌銘

并序

陳公諱韞字韜光西漢太邱長寔之遠裔也曾祖晏祖口先父澄偕高蹈不仕浪跡人寰以處默為輪輿以軒冕為桎梏教垂嗣允德冠我公作隱遜股肱為口山浚峭峻義方而口屬不閒宏心計而資給豐饒



卷二十九  
□用身安降年有永故春秋七十有八矣所宜溢斯  
上壽□有中庸誰謂劔沒延津珠貽淮水以唐□成  
三年二月二十七日寢疾於江□縣之私室□□□  
年四月七日歸祔於順化里黃缺五字 瑩禮也夫人譙  
郡曹氏先公三祀而□□□子□立□瘠綿頓幾不  
勝哀服慤經營面垢缺六字 有禮號慤而行路無聊仁  
孝光□以□父□二□□滎陽潘氏婦儀母道自彼  
抑揚豈不性□□公□□有自於戲言猶在耳音容  
已緘哀□臨岐誰無怨□父以曾蔭德字忝識前脩  
實錄遺芳刻於貞石銘曰

□德門所嗣兮退藏是先名與身孰親兮道在保全  
福壽所資兮天降永年遺芳不替而蒸蒸父缺四字 兮

□□□前古刻  
叢鈔

諸葛暉

暉大和中人

唐故聚府君墓誌銘 并序

府君諱慶字文悅馮翊人也大和六年青龍在壬子  
九月十七日歿蘇州嘉興縣進思鄉私舍春秋五十  
祖□曾祖瑄父達家諫具述不書也公卽達長子也  
志操孤峙孝友無先雖不夢奠之徵忽生鞋履之別



卷二十九  
娶陸氏有子二人長葑次允孚女一人偕血泣柩左  
狀疲問於筮兆當年十月廿六日封當縣南甘露鄉  
崇福里祖墳禮也恐煙峯及巨溟變改請文勒石詞  
曰

悲鴻驚月啼霜天寒雲長夜斗牛懸嗣子哀號望不  
還令問遺風光萬年佳城虎踞龍左盤刊文勒銘金  
石堅博拓本

南卓

卓字昭嗣大和二年賢良方正直言極諫科及第官  
拾遺因諍諫出爲松滋令大中朝歷黔南觀察使著

有文一卷唐朝綱領圖一卷羯鼓錄一卷

題劉薰蘭表後

余所善房叔豹豹好色得劉薰蘭最爲嬖後卽不復  
顧他色始余與房晏言薰必預故余得周視薰所舉  
凡爲言雖尙才功柔戲以樂左右而往往甚正命獨  
恨對薰蘭疑視之移晷刻將有嘲述卒不能云云顧  
余才不足當語薰耳十年冬余友沈下賢抵豹居下  
賢誠才尤精爲太史公言一見其書果能備薰善時  
余貢於京師豹與張孝標美善言文并挑笑事因錄  
沈述采余知薰之色而待沈之才才色兩相宜耶故



復叙之以繫於沈左

沈下賢集

呂述

述字修業秘書少監商睦二州刺史著有東平小集三卷

移城隍廟記

睦州城隍神廟舊在城內西北隅元和初年刺史鄭膺甫移置於城北門樓上其地舊置州獄及司法官廳開成四年刺史呂述移獄就六司院東南之隙地於廢址上立新廟堂屋三間五架階高三尺上設鴟尾三面行廊聯屬東嚮開門門外造廳一間一廈爲

脩容之所五年正月十九日廟成遷神像焉神坐後分畫侍衛於左右壁其門左右畫兵仗屏之南北列木寓馬二階前植松五本門外夾道亦植松三月十六日大備牲牢雜樂率將吏以落之今紀其祝詞於後云禮陳八蜡之名曰祭防與水墉事也然則城隍命祀本在勤人積厚成陰環茲郡國論功校重冠彼神祇自州城卜遷神位已固訪聞元和首歲移置郡樓下不在田乖鎮寧之義居無函丈闕鼓舞之容况乎列卒巡城通宵擊柝往來褻慢啟閉喧呼既違肅敬之方豈獲幽陰之助述謬膺符守親謁儀形睹籛



豆之虧廢歎祝史之偏窄雖飾以黼帳新其靈衣而居非所安理合改卜崇墉之內廢址猶存遂剏新宮式從弘敞丹刻咸畢翬飛有嚴練此吉辰敬遷廟兒伏願永安闕邃敷祐生靈使封境無水旱之虞牧守成富庶之績敢申崇奉毋媿聰明云開成五年六月一日刺史呂述建

嚴陵集

馬目山新廟記

睦州主烏龍馬目二山馬目在州西南勢如驚奔拔去不得中蓄怪態晏天常陰望之而知其能雲雨也先是州之右有潭曰層潭其深無至鱗物宅焉因立

廟潭上而馬目顧無之每有禱則附而祝曰告於層潭馬目之神開成己未歲六月江南大旱述乃致精意于神曰能雨則立廟越三日晡時雲氣從山來饋烝牆進空中濤喧俄而震雨隨下自是比旬必雨故民有半收八月既霽述泝江四十里而遠躬擇廟位果有一峯壓江隨水蕩搖蕃茂蔽覆淺濃百色周步其下絕無徑斬叢攀樛漸得峭脊蛇行而上百數步抵大石根如圭而頂如壺側視之有木一本十五榦垂覆三面無地獨其北平可居卜室昭昭乎神之告寧也乃依勢取高架為新廟明年三月二日戊寅成



卷二十九  
率將吏以釁之盥于瀑流席于香蕪挂豆籩于森疏  
響笙磬于蕭瑟燎于煙靄瘞于嵌空揚颿而下過醜  
酒祈福信可以畏百眾而雄諸祀也夫祭山曰廢縣  
蓋謂或廢或縣置之於山也今述相神之居也本其  
義矣尙承資于斯民同

顧齊之

齊之開成間處士

一切藏經音義序

慧琳法師俗姓裴氏疎勒國人也夙蘊儒術弱冠歸  
於釋氏師不空三藏至於經論尤精字學建中末乃

著經音義一百卷約六十萬言始於大般若經終於  
小乘記傳國初有沙門玄應及太原郭處士並著音  
釋例多漏略有西明寺玄暢上人克紹前烈晦明不  
倦志奮秋霜之淨心涵止水之鑒乃尋其遺逸蘊而  
藏諸焚之以栴檀飾之以綺繡光前絕後駭目驚心  
福祉生焉弘利博矣齊之不敏欲窺藏經乃詢於暢  
公蒙示音義齊之以爲文字之有音義猶迷方而得  
路慧燈而破闇潛雖伏矣默而識之於是審其聲而  
辨其音有喉腭斷齒脣吻等有宮商角徵羽等音曉  
之以重輕別之以清濁而四聲遞發五音迭用其間



雙聲疊韻循環反覆互為首尾參差勿失而義理昭然得其音則義通義通則理圓理圓則文無滯文無滯則千經萬論如指諸掌而已矣朝凡暮聖豈假終日所以不離文字而得解脫無師之智肇自心源析疑滯之胸襟燭昏蒙於倏忽真詮俗諦於此區分梵語唐言自茲明白又音雖南北義無差別秦人去聲似上吳人上聲似去其間失於輕剽傷於重濁罕分魚魯之謬多傳亥豕之誤至如四十二字母及十二字音從毗盧遮那佛心生則鳥跡蟲文之所不逮然源流有異音義無殊披沙揀金從理證性性得而言

可遣言可遣而文字亦忘同歸一真如則筌蹄弃矣上座明秀寺主契元都維那玄測皆精慧真乘獲持聖典文華璀璨經論弘瞻或道情深遠獨得玄珠或律行清高孤標戒月上以愜聖賢之意下以旌勤懇之心因命匪才敬而為序時開成五年九月十日

東洋

刻慧琳一切藏音經義

唐正辭

正辭開成間鄉貢進士

唐山南東道節度惣管充涇原防秋馬步都虞候正議大夫檢校太子賓客上柱國趙公亡



夫人譙郡夏侯氏墓誌銘 并序

夫人之先譙郡人後移貫深州樂壽縣昔武王尅商封夏禹之後於杞列爵爲侯伯厥後因爲夏侯氏漢有滕公諱嬰佐高祖定天下子孫益熾冠冕彌盛國史家傳粲然可觀曾祖諱載滄州長史祖諱確試太子詹事滄景節度都押衙考諱萼試太常卿充冀州南宮鎮遏兵馬使皆宥材茂器移孝作忠夫人紹餘慶於千年傳遺芳於三代備謙柔之行稟純淑之姿舉不違仁動皆合禮旣笄年之歲歸于趙氏克叶關雎之興允諧鳴鳳之求趙公以文武全才述職戎府

公家之事不違匡寧夫人內睦嫺親外承賓客輔佐君子清風穆然斯不謂之賢哲之行歟期天降鑒介以眉壽魚軒象服夫貴妻榮爲龍爲光焜耀閨臺何啻年始卅命奄歸下泉積善無徵吁可痛也以開成五年六月廿六日遭疾終於襄陽縣明義里之私第享年五十趙公愬戎涇上式過西蕃王事靡盬瓜期未至夫人瞑目之際不及撫床之哀窀穸之辰莫展臨棺之慟人之知者孰不爲之傷嘆焉以其年十一月癸酉朔廿四日甲申龜兆叶吉葬于襄州鄧城縣劫湖村之東壟禮也長子宗立當軍節度散將次曰



宗本鄉貢明經次日宗元次日宗式咸稟慈訓且服  
教義宗立宗元侍從防邊宗本宗式躬護喪事必誠  
必信禮無悔焉爰以夫人德行來請銘誌琢于貞石  
庶千載之後徽猷不忘恭副孝思乃為銘曰  
猗歟夫人植操無鄰孝由天性義冠人倫德行聿脩  
徽猷日新如何不吊奄謝芳塵展矣良夫護塞從軍  
窄窳有期歸路無因樊城之陰漢水之濱卜得鮮原  
嶽起孤墳秋草萋萋逝波汙汙德存于石磨而不磷  
刻石

鄭覃

全唐文七百二十一有傳

請賜五經博士祿粟奏

大學新置五經博士各一人屯田素無職田請依王

府官品秩例賜以祿粟

唐會要九十二

杜元穎

全唐文七百二十四有傳

劾李渤奏

渤賣直沽名動多狂躁聖恩含貸且使守官干進多  
端外交方鎮遠求奏請不能自安久留在朝轉恐生  
事

冊府四百八十一



封敖

全唐文七百二十八有傳

鄉老獻賢能賦

按此文見文苑英華題封敖名今存其目文

已見全唐文九百四十六卷

修斜谷路奏

當道先准詔令臣檢討卻修置斜谷路者臣當時差軍將所由領官健人夫併力修置道路橋閣等去七月二十日畢功通過商旅騾馬擔馱往來七月二十二日已具聞奏訖其館驛先多摧毀破壞併功修樹

今並已畢臣已散牒緣路管界州縣及牒鳳翔劍南

東西南川觀察使並令取八月十五日以後於斜谷

路過使命謹具如前

唐會要八十六

崔龜從

全唐文七百二十九有傳

宋昂殿兩選奏

前婺王府參軍宋昂與御名同十年不改昨日參選

追驗正身改更稍遲殊戾勅旨宜殿兩選

唐會要二十三

王彥威

全唐文七百二十九有傳



進唐典表

臣于太和六年伏蒙聖恩擢授諫官又叨史職注記之暇常覽國史臣輒略其繁文舉其機要起自武德終於永貞撰唐典一部凡七十卷謹詣右銀臺門奉進冊府五百五十五

上元和曲臺新禮表

臣聞禮之所始及損益之文布于前書不敢悉數開元中命禮官大臣改撰新禮五禮之儀始備又按自開元二十一年已後迄于聖朝垂九十餘年矣法通沿革禮有廢興或後勅已更裁成或當寺別稟詔命

貴從權變以就便宜又國家每有禮儀大事則命禮官博士約舊爲之損益脩撰儀注以合時變然後宣行卽臣今所集開元以後至元和十三年奏定儀制不惟與古禮有異與開元儀禮已自不同矣又檢脩禮官故事每詳定儀制訖則約文爲之禮科以移責于百司又約之以供備然後禮事畢舉禮科者名數之總與儀注相扶而行者也闕一不可臣今所集備禮科之單複具供給之司存欲使謁者贊引之徒官長辟除之吏開卷盡在臨文易徵其他五禮之儀式或舊儀所不載而與新創不同者莫不次第編錄竊



以聖朝典禮于元和中集錄又曲臺者實禮之義疏  
故名曰元和曲臺新禮并目錄勒成三十卷謹詣光  
順門奉表以聞伏乞裁下

唐會要  
三十七

盧宏正

全唐文七百三十有傳

題柳泉驛

余自歙州刺史除度支郎中八月十七日午時過永  
濟渡卻自度支郎中除鄭州刺史亦以八月十七日  
午時過永濟渡從吏部郎中除楚州刺史以六月  
四日宿湖城縣今年從楚州刺史除給事中計程亦

合是六月十四日湖城縣宿事雖偶然亦冥數也

南

新書

柳仲郢

全唐文七百三十有傳

唐故柳氏長殤女墓誌銘

并序

嗚呼天不與壽而生不能成其美者我家之殤妹名  
老師是也會昌五年五月二十一日殤于昇平里第  
享年一十有六兄仲郢見任京兆尹以爲家有世祿  
著于族係官諱嚴重不敢書蓋亦以彰幼而有知  
之體粵以六月二十一日葬于杜城村准經制也兄



仲郢揮涕執筆誌其石云

惟我幼妹中和率性粵在孩提自知誠敬名滿姻族  
謂宜承慶天何難達福乃遄罄人之有生修短前定  
其所陰隲豈不助正今茲及忽綿歷疾病徒言稟授  
實獲余聽城南別業□城開逕臨穴于此保爾安靜

常山貞

石志

崔杞

全唐文七百三十二有傳

大理寺官犯贓加等奏

當寺官人今後在寺詳斷或出使推案有犯贓私者

請于常式加罪一等餘犯即准舊式唐會要六十六

庾敬休

全唐文七百三十二有傳

制置除陌等錢奏

劍南東川西川山南西道每年稅及除陌錢等伏以  
劍南道稅茶舊例委度支巡院句當權稅當司於上  
都召商人便換大和元年戶部侍郎崔元略與西川  
節度使商量取其穩便遂奏請稅茶事使司自勾當  
每年出錢四萬貫送省近年以來都不依元奏并三  
道諸色錢物州府多逗留不送皆不稟奉今請取江



西例勾當於歸州置巡院所自勾當收管諸色錢物送省所冀免有懸欠仍令巡官李潰專往與德裕遵古量商制置續具聞奏

冊府五百四

劉寬夫

全唐文七百四十有傳

論陳皓自引罪奏

昨論皓之時不記得先後唯執筆草狀卽是微臣今既論事不合臣甘當罪若令尋究根本自相推排恐或遽相誣執有損事體凡所論差誤臣盡甘當罪

唐會要五十六

崔琪

全唐文七百四十一有傳

禱雪終南廣惠廟奏

畿內去冬少雪宿麥未滋今欲差少尹於終南廣惠公廟祈禱諸縣各委令長於靈跡處精誠祈請

冊府

李漢

全唐文七百四十四有傳

舉人不試詩賦奏

准太和七年八月勅貢舉人不要試詩賦策且先帖大經小經共二十帖次對正義十道次試議論各一



首訖考覈放及第唐會要七十六

周太元

全唐文七百四十四有傳

雜物結贓估斷奏

准制條云雜物依上估絹結贓所犯若干匹並無估定計折字者伏以監利物與兩稅物好惡有殊一例科決慮憂有屈今請盜換兩稅綢綾絹等物請依元盜換匹數結罪科斷更不估定如盜換監利物雜麻布焦葛匹段絲綿紙及諸色進貢物不是兩稅匹段等請准法式估定數依上絹結贓科斷唐會要四十四

楊歸厚

歸厚扶風人元和中自左拾遺貶鳳州司馬歷官鄭號二州刺史工書法受之皇甫閔

鄭州置驛路奏

當州郭下管城不置在州城內使命往來出入非便

伏請准汝州例置驛路於城西唐會要八十六

馬植

植字存之第進士補校書郎開成初為安南都護清淨不煩洞夷安之宣宗初同中書門下平章事終忠武宣武節度使



升武陸縣為州奏

當管羈縻州首領或居巢自固或為南蠻所誘不可  
招諭事有可虞臣自到鎮以來曉以逆順今諸首領  
願納賦稅其武陸縣請昇為州以首領為刺史唐會  
要七

請給杜存誠印奏

當管經略押衙兼都知兵馬使杜存誠管善夏四鄉  
請給發印一面前伴四鄉是獠戶杜存誠祖父以來  
相承管轄其丁口稅賦與一郡不殊伏以夷貊不識  
書字難憑印文從前徵科刻木權用伏乞給發印一

面令存誠行用唐會要  
七十三

黃綯

綯鄉貢進士

朝散大夫使持節韶州諸軍事守韶州刺史上

柱國陳府君墓誌銘 并序

嗚呼陳府君罷牧韶陽挈家東還邁疾終于道喪及  
乎故里其姻家有濟南五經暉造吾廬曰熟子以文  
自重素矣今陳府君實番禺支侯有朱紱皂車之貴  
將歸骨地下欲吾子為誌諸美盛備乎陵遷斯足以  
波振雄藻耳愚曰夫文之所以可觀者在乎無苟毀



譽故得其道則爲文失其道則爲詩愚之所重者蓋守其道安敢以己爲乎且古之名器不虛假人故二千石爲重今四方多梗國家用兵有執政者務足去聲口國力所以入仕者半蹊於財利裂壤者多出於權族濯豎而巾抑足以富有方土矣是則府君於古實爲盛於今實爲室儒之職固願伸白其道編次于文安俟濟南生孜孜過其詞以相勸乎於是聳然執管而唯命曰

府君諱讜字昌言其先潁川人太邱宰仲弓之後也晉末避亂于閩因而家焉曾王父護同州司馬王父福侍御史內供奉皇考慈大理評事贈兵部郎中皇妣彭城劉氏贈彭城郡君自同州司馬至兵部郎中皆性於高逸不以爵祿自拘鏞匱德於己發爲禎符以鍾于府君府君爲兒時便知不以沙土戲玩岐嶷有志欲大其門求司馬子長而下三家書外其身以窮之板卷釋然洞得心髓裴公帥閩日嘗大器之命與子弟處子弟卽故相國公坦也年中乃西與計偕以發泄奇蓄遇公道大開聲光崛振僅及口舉遂擢高科時尤重其名榜下授秘書省正字後歷調授涇陽尉後又尉奉天江夏令其同寮以道相知許者莫匪



名賢鳴玉鏘金迭登朝右不可殫紀顧公汨沒常調  
皆不自平欲拔在班行間公切於問安堅乞一官還  
家遂授此府長史朝彥嘉之相率以詩爲贐紹溢緡  
帙到今街童巷妾亦能榮而歌之未去於口公及釋  
夏服久之方起塋壠會故相國裴公時節制襄川章  
行業上聞遂授春州刺史公旣莅止以公爲家以民  
爲子撫而理之咸飽其賜如乳飯口朝廷能之復命  
牧韶之人復若春之人禮讓大興於蠻貊風謠洋溢  
乎遠邇咸曰吳隱之之投香王子貢之止水蓋異跡  
而同德耳公前娶于汝南周氏奉嬪君子內助宏多

不幸中年與物先化後娶于范陽盧氏封范陽縣君  
皆華族令儀蘭芬玉映中饋增輝他族取則汝南夫  
人有女四人長適于濟陽蔡漪次適于汝南童珣次  
適于高平邵殷次適于彭城劉極皆抱器懷才爲州  
呈椎美而復在瑀席之選焉范陽君有子一人曰渥  
有女二人渥天與英敏志專傳業居喪逾禮孝感有  
聞吾知敬仲之風其將復振矣弟二人仲曰口處性  
冲厚時譽暢茂恩授幽州昌平縣令季曰誨舉進詞  
學優富流輩多宗之命不偶時累戰失捩鄭司空愚  
辟署南海掌記試秘省校書親舅全正鴻少卿次全



交前開元禮見任河南清縣主簿內弟知新三禮登  
科見任陝州司馬皆搢紳上流當代名士故具于是  
以明中外之盛耳噫公之名德富於身功利流於人  
朝廷方將大用之以爲諸侯標鏡位僅止於專城身  
奄謝于南陬得無痛惜哉時享年八十有三葬于侯  
官縣葛崎之先塋禮也黃氏子旣伸白其道乃掩袂  
薦之以銘曰

鳥有鳳獸有麟雖居處之非異蓋凡聖之非倫山爲  
波石爲塵遺耿光而泯

續語堂  
碑錄

柳正元

正元開成四年爲閑廐宮苑使終大理評事

放停宮苑使料錢奏

當使東都留後知院官鄭鑑每月院司給料錢三十  
四貫文兼請本官房州司馬料錢今請於使司所給  
料錢數尅減十千添給所由二十人糧課巡官二人  
請勒全停郢州舊因御馬配給首蓆丁三十人每人  
每月納資錢二貫文都計七百二十貫文其州司先  
以百姓凋殘闕本額量送三百九十六貫文今請全  
放當管修武馬坊田地伏隄太和二年河陽節度使  
楊元卿奏請權借耕佃充給閑用今緣安利一軍伏



請永配主管伏以當司應屬東都宮苑閑廡事務管  
係舊額名數尚多苟在影占之門是啟非違之路但  
係務繁地遠訪察尤難况推禁罪人動經旬月因緣  
流滯移牒用情事務委留守主管曹司煩職官吏冗  
名俾無尸素之員又去申報之滯其東都院每年合  
送宮苑使加給錢一百二十千文亦請停送當司方  
圖羨餘自備課料伏乞聖慈允臣所奏

唐會要  
六十五

李固言

固言字仲樞擢進士甲科累官戶部郎中進給事中  
尚書右丞出爲華州刺史大和初召爲吏部侍郎九

年進門下侍郎同平章事屢出爲節度使終右僕射  
卒年七十八贈太尉

監倉御史五日一人入倉奏

監太倉殿中侍御史一人監左藏庫殿中侍御史一  
人臺中舊例取殿中侍御史從上第一人充監太倉  
使第二人充監左藏庫使又各領制獄伏緣推事皆  
有程限所監遂不專精往往空行文牒不到倉庫動  
經累月莫審盈虛遂使錢穀之司狡吏得計至於出  
入多有隱欺臣今商量監倉御史若當出納之時所  
推制獄稍大者許五日一人入倉如非大獄許三日入



倉如不是出納之時則許一月兩入倉檢校其左藏  
庫公事尋常繁鬧監庫御史所推制獄大者亦許五  
日一人庫如無大獄常許一旬內計會取三日入庫  
勾當庶使當司公事稍振綱條錢穀所由亦知警懼  
唐會要  
六十

知彈御史專掌京城奏  
知彈侍御史自京城百司及天下諸州府等公事應  
關文法者皆先申臺司舊例配知彈侍御史一人專  
掌其事至朝日入閣又對仗彈奏中外臣僚不如法  
者事最繁重又須詳精一人當之實恐不逮臣商量

請知彈御史一人專掌京城百司公事皆彈侍御史  
一人分掌諸州府之事庶使官業各脩無所遺闕

唐會要  
十一

張諷

諷大和中為刑部員外郎吏部郎中夔州刺史

議親議貴奏

其一議親曰皇帝至太皇太后皇后親有內外服同  
者皆在議條伏以親疎之序既有等衰即雨露之恩  
皆宜沾洽此實皇王大猷自家刑國親九族協萬邦  
之旨也近者絳州刺史裴銳所犯賊罪至深陛下以



太皇太后之親下尚書省集議此乃陛下知刑賞之  
理重與眾共之伏請今後親有任刺史監臨主守犯  
賊罪得蒙減死者必重其過直以賊罪為汙累定刑  
流決外其後子孫並不得任理人官及為監臨主守  
庶得家知其恥人革非心其一議貴曰謹按禮經貴  
謂近于君也非獨高秩厚俸之為貴今後刺史非在  
朝文武職事三品官任者於所部犯賊抵死罪並不  
得以刺史品秩議貴徵司議條免所犯罪如先任在  
朝三品合在議條者即准議親條決流外子孫並不  
得任理人官及監臨主守如有法官及本官推官不

詳官品妄有引議請科違勅罪其功勤賔故等有犯  
賊罪同者並請准親貴之法唐會要三十九

李衢

衢大和中屯田郎中修玉牒官

進皇唐玉牒一百卷著  
皇室維城錄皇唐新譜

玉牒特創嘉名奏

竊以聖唐玉牒與史冊並驅立號建名期于不朽伏  
乞付宰臣商量於玉牒之上特創嘉名以光帝籍唐會  
要六十五

崔鄆

鄆第進士累除刑部郎中遷吏部侍郎由宣歙觀察



使入為太常卿文宗末改中書侍郎終淮南節度

旌陳珽五代同爨奏

溧陽縣百姓陳珽五代同爨請蠲除賦稅旌表門閭

府冊

滕珣

珣大和三年以右庶子致仕

乞給券奏

伏蒙天恩致仕今欲歸鄉家在浙東道途遙遠官叅

四品伏乞特給婺州已來券庶使衰羸獲安光榮鄉

里唐會要

六十七

呂貞儉

貞儉開成中進士

陳少公亡太夫人蔣氏墓誌銘 并序

夫人族本樂安郡鄆府節度押衙兼御史中丞裕十  
七代孫派流遠裔簪紱相承祖皇虔州灑縣尉父政  
好游山水志考詣文弃業從途終于虔州夫人即公  
之第四女也少而孤露育于母手每思其親常哀咽  
不食而竟夕繇是親戚咸哀而異之性直寡言喜怒  
未常見於色及笄歲嬪于陳氏性仁溫孝能奉舅姑  
於娣姒之間偏休撫愛姑常謂之曰蔣氏新婦解吾



意每所動用皆合吾心此乃婦德也有子二人男一  
女女出侍江家男季端娶故徐州彭城縣尉劉氏第  
三女也有孫四人長孫師貞次孫宮十李老金娘等  
自夫人於開成五年六月中旬臥疾伏枕至今春漸  
將逾殛知□期向終顧爲其男曰吾氣力頓衰殆將  
不起夫禮節廉讓汝粗知也吾終之後汝主奉家業  
當謹節溫勤無至哀毀此卽吾瞑目無憂子遺此示  
向卯而終享齡六十九矣以其年春二月十三日甲  
寅寧神卜兆于江陽縣嘉寧鄉北五乍之平原禮也  
嗚呼泉扃一奄選于千古蕭蕭松栢煙伴愁雲宵宵

孤魂路乖親戚嗣子季端恐陵谷千變乃尅石紀銘

其詞云爾

其一日 漠漠春雲歸無處所悠悠大川賢愚一路夫  
人德行奄忽朝露刻石紀銘以永千古 其二日 恍恍

魂遊逝水森森墳簪荒川望口雲兮氣絕號叫聲咽

空原會昌元年二月十日日記

刻石  
趙博齊

博齊大和間人自署口陽隱士

大唐故朝議郎河南府登封縣令上柱國賜緋

魚袋崔公墓誌銘 并序



忠信篤敬天爵也淵默誠慤者有之卿相祿位人爵也運機□□者得之至於志意脩而驕富貴道義重則輕王侯由是論之人與天一何遠哉今見之於崔公矣公諱蕃字師陳魏郡博陵人也自食菜受氏世有明哲子玉以座右顯季珪由屏風著或以春秋筆削自任或以嫉惡鷹隼興謠後魏定姓氏族爲第一風流熾焰以至公大王父元隱皇朝比部員外郎王父誦華州司法參軍父澣少府監贈散騎常侍皆以清重稱美首冠士流於戲侯王不繫其本根鳳鸞必生於丹穴公卽右貂之仲子也早以門蔭補□文館

學生試經高第授華州參軍歷攝諸曹若素更練方辯才之適用也次授鄭縣主簿未上邁內艱色慘神傷泣飲而哀衣裳外除猶杖而起久之方調授鄭縣尉不樂煩劇辟疾就選授左金吾衛錄事參軍蘭錡□清聯獲殊畝以政治脩舉爲樓煩陳公所辟爲監牧使判官奏大理評事公勤績著羣牧孳息轉大理司直兼殿中侍御史陳公改遷又爲後使郭公邀留奏殿中侍御史遷監牧副使驕駟駿服御稱旨特加章服以報勲勞朱紱煌煌益光寵命郭公以稱望彌重非外□所堪上表薦聞除河南府倉曹叅軍秩



滿調集天官又以才出九流記名宰府眾謂此時必  
 居廊署執政失鑒除登封縣令咸共寃歎公獨欣然  
 之官二旬遂至顛殞大和癸丑歲閏七月三日啟手  
 足焉享年五十有九夫仁者必得其名必得其壽宰  
 輔不至耆傳尚遙稽驗前志一何爽也公率性閑暇  
 襟抱澄曠弱不好弄樂道遺榮自幼至長不易其操  
 德宗韋賢妃公之從母也恩榮重沓缺四竟以冲退  
 不受其榮家貧位卑斷可識矣娶河南于氏有子二  
 人長曰□約挽郎出身次日閻六歲與名齊戲罷輒  
 啼傷心徇極有女□人長適太原王氏餘未及笄皆

泣血呼天行路哀歎季弟著檢校太僕少卿□州別  
 駕手足情重灑淚盈襟撫孤奉櫬以其年十一月八  
 日歸葬于京兆□□縣寧安鄉曲祔先塋也博齊與  
 公少相狎長相愛芝焚蕙歎吾□□□用感生平泣  
 而銘曰

孔周之劍不能煞人光含冰雪閑匣生塵上稽徃古  
 藝絕無隣缺六今辰岳岳登封深懷至仁垂髫啟手  
 不喪其真道非偶運不執□□身為帝戚且復居貧  
 冲謙抑退安此沉淪緒傳萬祀孰不書紳少陵原畔  
 萬木無春唯餘令德終天不泯石刻



萬木無春却猶合為殊天不廷  
 中編併發安北流餘辭辭萬家  
 不更其動誠非難數不博口口  
 令氣岳岳登性辭辭任口垂  
 其間之懷不謂流八次舍不  
 公少卧飛身卧安芝焚其燭  
 日報養于京兆口口禮宜安  
 血和天口潤京煇季餘香



唐文拾遺卷之三十一

榮祿大夫三品頂戴前分巡廣東高廉道加四級臣陸心源輯

余球

球會昌中人

五大夫市新橋記

夫山嶽降靈非大聖無由開化適化所有非釋教無  
 以導心於是會稽東不遠七十里有大澤曰虞江江  
 之東南廿里有草市粵五大夫在鳳山南面山則連  
 環朝仰如君臣相挹有序冠纓雖異人莫能測本因  
 焦氏立瑩於此孝感上聖而為名焉故其地也聚天



下之民鬻天下之貨市之南崗則德興村大雲寺置  
莊於茲市之北新江路路通於市則黃山河古人以  
約之將接行旅爲不滯之由緣不壯不麗危而且險  
或遊童牧豎登陟於此多悞斯墜墜以父母兄弟□  
噫相仆爲民所病時大雲寺僧常雅公本吳郡富春  
孫氏因宦徙居金華焉上人少小聰慧知釋教之可  
歸卅歲從緇心若水鏡戒全鵝珠窮阿難之妙音洞  
迦葉之微旨旣見我皇帝乾元啓運布德維新遂乃  
發心慕緣造茲橋二所其橋上臨星斗下跨洪流資  
萬世之妙因旌千秋之勝善時有前溧水尉彭城劉

公臯發心造斯勝幢共議□卓立南岸用彰永福 缺  
太子嶽牧縣宰父□師僧十室長幼資其冥福使億  
劫著善爲行旅揭厲逃炎送餞賞翫怡神者哉時廉  
使李公仁風遠扇臥牧百城邑大夫王公術過烹鱸  
軫嵇琴於棠樹□丞公簿尉諸公有仇香之異能同  
梅眞之惠化并州縣職吏及市內尊幼四村檀越並  
八龍兄弟三虎子孫共植勝因同崇廣福會昌三年  
歲在淵獻月屬無射二十有九日建  
□唐會昌三年建此幢至五年八月奉敕毀寺其幢  
隨例亦毀至大中卽位元年佛法重興至四年庚午



歲秋七月九日前宣州溧水尉劉臯與當鬪鬪信士  
等同募緣而再建立於□夫橋南□丹雘周圍伏慮  
代□□□後人不曉遂尅金石聊□□□廉使李□  
令常□□□主簿羅□尉李□鄭□□□□將鄭  
□勾當陳繼宗馮招越中金石記

于漬

漬京兆人會昌中鄉貢進士字子漪終泗州判官

上誌銘并叙

夫人李姓燉煌遠孫曾祖承家皇越王府司馬祖庭  
琇皇朝散大夫太子典膳郎父衮皇虔州刺史賜紫

金魚袋夫人即衮之第二女生河東柳氏嫁京兆韋  
敏敏先夫人而歿夫人為女淑為婦幹奉釋仰道雖  
緇衣黃冠不能嘉也諧六親奉公敬假假然不搖其  
儀適幼指卑入則躬善夫之前媿有女有男撫育煦  
暖雖熟知審識者亦不辨其異出也四十五年稱未  
亡人計生活於郊屋荆扉瓦牖食糠羹藿眉不戚澀  
怡怡然若居朝市食香脆也開成四年八月廿□日  
無□不適□疊足如寐沒于京兆府雲陽縣龍雲卿  
之舊第享年六十六隣里鄉黨慟若已屬用會昌五  
年正月廿□日葬于興平縣茂陵鄉肺浮原接先夫



人適口門口口口娶是不口耐夫人已無有出章  
前室男曰通娶李氏官及成都新繁尉女曰婉妻榮  
陽鄭氏皆前夫人而終通之子嗣實茂實皆順而孝  
悲奉葬具已得兆時祈外兄鄭茂卿請識墓於京兆  
于瀆瀆於鄭之親亦鄭於章之類也是為銘曰  
嘻夫人生有云女良族婦德門折有儀揉不紛跂道  
釋瞭無昏無厥家法可尊嗚呼兮復其魂遠安兮穴  
有墳石刻

王儔

儔會昌中試左驍衛兵曹參軍前延州防禦衙推

唐故宣功參軍鉅鹿魏君夫人趙氏墓誌銘

并序

公諱邈字仲方世本云秦改魏為鉅鹿郡也後徙家  
于山南今則洋州興道人也昔周建侯王是稱盤石  
國命良相諡曰文貞公自棧派初分導自洪源之注  
蘭蓀並振時為銓藻之芳祖賓父朝隱皆敦儒術諒  
識弘深高樂園林自求野逸公孝達參閱學茂游夏  
稟志孤貞潔行端操頃因入仕多為台鼎廉察之知  
累以德藝精粹聞於天庭始奏授懷州參軍次選授  
果州司戶參軍次任婺州司功參軍次任宣州司功  
參軍凡歷四郡皆以直道佐理惠洽優人官賴其能



民受其福以茲樹善旣至必獲神休豈謂天喪貞良  
倏延荒瘵乃針石靡効寘齡益乖奄忽俄然盡爲松  
檟是則逝波湮沒而不還風燭泯光於殘夜以元和  
九年十月十三日不祿於任壽年五十有五卽十年  
四月護歸京兆窆于萬年縣洪固鄉北韋村北原也  
夫人天水趙氏考皇任婺州長史昇之仲女也少習  
師保內則素彰懿淑茂儀柔順芳婉而乃失翼凌虛  
亡舟涉濟孟母彼美敬姜謂歟以會昌四年冬偶嬰  
微疾殆踰累旬冬筍冰魚日無不至十一月十五遂  
歿於延州豐林縣之私第享年七十有五今以五年

十一月廿三日護喪祔于萬年縣洪固鄉北韋村北  
原禮也有女四人長適皇甫氏次適李氏次適侯氏  
幼適王氏並早閑保傅克就柔儀女德婦功怡聲婉  
婉或逝川不返或婦言益嘉雖女史無口亦家誅自  
口有子三人長曰齊貢前任延州豐林縣令次曰匡  
贊前任劍州青女縣主簿幼曰文質任解州永泰縣  
令俱以簪笏宦途學行清敏政則洽民惠乃周物自  
口口口貞泣血絕漿號護牆翼毀瘠終制及靈車南  
邁哀戀北堂禘嘗之儀晝暮增潔竊以雁行式序祈  
詩永年土木非剛刊石爲事儔每媿孱薄冲讓未獲



辱命染翰爲詞頗難銘曰

黑水之西終山之北厥土上上人惟溫克鄴謂之先  
秦風是則簪笏所繼其儀不忒淑慎佳美咸曰貞廉  
婦禮乃著母德式瞻家以義徙子以道謙未獲榮養  
奄弃恩嚴豈曰盛衰抑奪人慾千載之後悲此山曲  
刻石

崔耿

耿清河東武城人崔隱甫曾孫也會昌元年爲衢州  
刺史大中六年官安南都護

東武樓碑記

衢之城成於龜山崢嶸嶺上其守之居西北角有樓  
以女名之其樓深在守居靜固之地女子所居宜之  
名樓之宜豈然乎哉又按信安分於東陽昔姑蔑國  
也其地上當婺女之舍次意其號樓亦或在此圖經  
無記宿老昧傳故莫能知其所以女名其樓之義者  
結構年深土木疲憊關鍵交付參差傾脫每登之慄  
乎反懷憂豈能消憂者歟會昌辛酉歲余祇命作守  
至此踰月條悉郡理之餘視其將毀壞命工度其形  
勢執已去不可留難加補葺乃重作之上樓下室木  
架侏儒兩兩相接接爲衆柱中匪全力氣不兩交遂



去聯綴代以偉幹而貫之扶持已有道根本自然牢固矣東南磴路本合而未歧斜委閭通曲回取便有似乎宵人之逕今不出其梯更加其級引其執直其道安而行之左右升降洞然無衝礙焉南附小樓內同其無外揭其有舒二翼而北抱之室立壁垣樓徹戶牖有山在前有水在下浩然羣籟孳孳哦哦陰魄懸光陽輝陞照一邑風景萬井人煙笛怨切而歌清亮飄飄然出乎虛無無際問春日暖而花含笑夏風涼而簷度涼秋氣澄明而慮澹冬景曠通而望遠歷四候之變態觀萬物之動息美景開筵宴於是暇日

閱圖書於是時俗獎朋譽顧我無遊徒偃仰雖欣於所遇慙懼不任其共理安其所安聊樂以處耿也本清河東武城人因六代祖岐叔諱鑣仕隋爲散騎侍郎內史舍人文林館學士應詔入洛遂留于都在前代代其家在後光啓舊土開元中曾祖考太保忠公以道事君任冠中外自并入覲報政冊勳復開國於東武城於戲大凡爲人後者動一意舉一足不敢忘其本因舊址作新樓北向臨風萬感俱集強名東武以成愚志遂磨貞石日而月之書其所以然也

嘉靖  
衢州

府志



郭圖

圖官倉部員外按雲溪友議即官石柱題名圖畫見聞志皆作郭圖

胡氏亭畫記

藝遊而至者則神傳焉神傳者國寶矣墨妙之於藝又加□貴焉浮圖燄梁熾今國力不能追也故藝之至者雖鴻德巨儒亦伍於工徒矣唐故宰相薛公稷畫入神品以名之重時加貴之成都靜德精舍有壁二堵雜繪鳥獸人物態狀生動乃一時之尤者也吾后帝字之五年汗叛帖夷萬方無事於是大去蠱人之疾以浮圖氏為最詔走御史監毀域內之祠凡雲

構山峙之宇一時而壞百工之名跡隨去焉胡氏瓌文而好古惜少保之迹不存於鄉迺操斤挾黨力剝於頽塗之際得人三十七頭馬八足又於福勝祠獲展氏子虔天樂二十五身及鄉之名工李氏感天樂十二色皆神傳異跡陷于茅亭之壁長者之車益滿門矣任愚子若缺時寓蜀壯君好事之心亡於壓覆於染醉豪紀其始於石會昌五年五月三日益州名畫記

宋誠

誠廣平人會昌中鄉貢進士



卷三十一  
八  
蒼山廟記

蒼山在州西纔十五里水陸之途通焉連屬之勢亘于西南隱隱崇崇臻此而止自郡城暨于山嘉樹脩竹映夾道側聯聯不絕如在翠帳間行遊是山若造非常之境羣峯疊秀烟樹羅碧清猿好鳥叫嘯其間實神仙之所居信東嶽之佐命山之南又有澄潭周環百餘步空闊沉碧逗而不窮旁倚峻巖穴通溟漲峭壁削以直聳清泉貫而下垂潭承其泉而龍是宅每天將晦必雲物鬱乎其上或清旭晚照輝映相鮮嵐障千里水光一帶烟靄蒙翳如列畫屏峻彼西郊

作鎮茲土會昌四年冬梁國喬公自尚書郎來守是邦每景物澄霽升高而望茲山覺峯巒之有異公曰是山也得不可於吾土乎明年夏將旱公懼歲之不登憂民之歉食雖土龍徙市啓千百神曾未果應公曰余爲之長郡之旱民之災是亦警余之或未勤乃召易者而筮之得山澤損之卦筮者曰艮上兌下爲損損而後益乃豐歲之象艮爲山兌爲澤爲西方雲澤之氣果應爲西得不爲蒼山之兆乎公遂躬禱是山請以民之災寘于誠告明明山不闕靈車未及旋索澤如懸槁苗亘青若雲布川是歲果登乃自茲山



厥後陰陽其或乖度俾吏致告靡不響答公又曰禮云能禦大災則祀之水旱者民之災也是山果能與布雲澤救民之災得不廟而祀歟遂命工人爰構廟室于山之陽六年春三月廟告成乃戶乃堂飛軒翼張粉績糊頰東西其廊像設無譁威容肅莊儼若舊制候公而昌秋七月公大備牲牢羅絲竹于廟庭之下躬自薦拜以答神社因命鄉貢進士廣平宋誠記其事以誌于廟乃重爲贊曰

懿彼蒼山吐納陰氣興隆雲澤救民之瘁實自我公誠明期至以虔以禱引過諸己玄鑒周明布膏于地

歲旣豐盈惟公之致爰立廟堂示民以依春秋薦拜水旱云祈有舉無廢在禮而知靡煩靡瀆無逾我儀

赤城集

蕭珣

珣會昌中人巴郡軍事判官

唐巴郡太守滎陽鄭公新建天王記

浮圖教以象法化人修功德者於經文爲定學在俗

緣缺五

歸於善也又按釋氏說毗沙門居須彌一面

爲四方

缺六

又輩受約束取指撝於我北方以衛羣

有珣肄幕餘嘗諷佛書見毗沙門本經則杖槩戟掌



卷三十一  
塔廟鎧甲而立者常儀也南瞻部洲之□□戾神爲  
時患者毗沙必乘逸足手斧鑕驅山林江海之神王  
師伐叛以剪殄邪謬爲民除害別於生人亦謂有功  
者巴郡太守滎陽公惠於民信於士虔於浮圖者也  
居家必潔室嚴香大□□之具置毗沙其間歲時月  
弦朔必儼默簪裾跪禮至再前剖郡符皆建厥像於  
其土必盡嚴飾果求精妙旣迨巴川於郡之南山視  
峭嶂斗絕有嚴黃門武鑄鏤釋像之所乃命工爲國  
及闔境寮庶立毗沙於其側姿容端莊丹牘顯布就  
建華屋以護風雨豈唯將來之勝因亦郡城之佳坵

公夫人彭城劉氏初從公來郡自魚軒在途寒暑生  
疾亦有善願迺立救苦觀音於毗沙之左具妙誠恪  
莫可殫說珣實從公爲州從事奉命紀述有愧不埶  
時會昌六年十二月廿二日記金石苑

沈櫓

櫓會昌中鄉貢進士

唐趙夫人故河內張氏墓誌銘 并序

夫□人不□□物通□阜□與世俱行孝敬存家令  
德彰茂夫人河內郡□雲陽人也夫人幼嫻軌則門  
望之崇旣笄之年歸于天水趙公之□□夫人□□



母教動叶禮儀處室也功容允明辭家也德言咸備  
四□□□婦道于何有方期兆鳳皇之吉頌螽斯之  
宜內外□□□□何疾□□殛大夜將奄時春  
秋五十□□會昌三年歲次癸亥四月廿四日終  
于長安延壽坊之私第□□趙公家世儒流夙聞風  
雅四男成長二聘室兩女有家長男師□□□□  
□□陽縣主簿官貞政理鐘鼎是期次男師牧師  
□師運皆□以□力□□曾參甘旨不虧長女幼適  
河內張□任定遠將軍前光王府典軍次女早適樂  
繁任濠州□□縣尉並温温潤德□睦謙柔送往慎

終僉悲薤露卽以其年五月廿六日窆于京兆府長  
安縣小嚴村之原禮也恐陵谷遷變家世湮淪故刊  
于石以誌綿邈其銘曰

洎乎有歸逝于德輝令望益著殲□□姬孤貞四被  
天不憖遺誌彼泉石名留不廢

石刻

李珣

珣武宗朝御史中丞

監察御史代監左藏庫奏

御史臺舊例太藏左藏庫以殿中侍御史兩人分監  
今請以監察二人代之仍放朝參本俸外依舊加給



三十千出納小差委以彈舉

冊府五百十六

裴誼

誼武宗朝大理卿江西觀察使

詳斷刑獄取最後勅為定奏

當寺格後勅六十卷得丞謝登狀准御史臺近奏從  
今已後刑部大理寺詳斷刑獄一切取最後勅為定

唐會要三十九

請任百姓自醞奏

當道從大和元年觀察使李憲以軍用不足奏請禁  
百姓造酒官中自酤吏緣為奸酒味薄惡老病生產

盡不堪任公開倖門私謗盈路臣叨膺重寄合務便  
人請停官酤任自醞造臣請諸色方圓節儉冀使軍  
用濟辦人無怨咨

冊府五百四

權酒錢不配業戶奏

洪州每年合送省權酒錢五萬貫文舊例百姓醞造  
其錢依前例隨百姓兩稅貫頭均納當管洪州停官  
店酤酒其錢已據數均配訖並不加配業戶

同上

崔元式

元式累官湖南觀察使宣宗初以刑部尚書判度支  
拜門下侍郎同平章事進戶部尚書卒謚曰莊



卷三十一  
三  
禁斷次弱綾絹奏

准今年七月二日勅諸道所出次弱綾絹紗等宜令  
禁斷若舊織得行使仍委所在官中收納如輒更有  
織造行使買賣同罪須指射出次弱物州府令戶部  
支度鹽鐵三司同條流聞奏者省司先牒左藏庫勘  
到所出次弱正帛州府名額伏以綾絹紗等州府所  
買機杼織造並合堪充煑練既不堪衣着則虛費織  
功今欲委諸道節度觀察使刺史差清強官搜獲百  
姓織造濫惡正段狹小機杼焚毀其惡弱正段仍俱  
收納數聞奏冊府五百四

吳汝納

汝納河南府永甯縣尉

訴吳湘屈殺狀

臣弟湘去會昌四年任揚州江都縣尉娶故青州衙  
推顏悅女爲妻被都虞候盧行立等誣譖於節度使  
李紳遂下獄枷禁估阿顏資從衣服作錢數豎稱正  
賊又豎顏悅繼室阿焦爲百姓奏狀稱是百姓阿焦  
女且女從父况嫡母已死今豎是阿焦女足爲加  
若父是百姓自有格律臣弟亦不合處死於時諫  
官上論差監察御史崔元藻爲制使重推知臣弟至



冤文案入奏元藻下獄貶竄乞下臣狀於法司追取  
盧行立劉羣江都縣令張引思元推官典崔元藻覆  
推官典魏鏘元壽等推勘即知李德裕用情為李紳  
屈殺臣弟冊府八百七十五

楊士端

士端翰林待詔

光陵柏城不宜動土興工奏

義安殿大行皇太后陵地准今月五日勅奉光陵准  
經今年太歲在己丑季土壬年不宜於光陵柏城內  
興工動土宜於光陵封外東西北三面有地平穩處

別擇置陵吉

唐會要二十一

李回

回字昭度長慶中第進士會昌中以刑部侍郎御史  
中丞遷戶部尚書坐決吳湘獄不糾擿貶湖南觀察  
使

文武常參官准例置引馬奏

文武常參據品秩令式合置引馬臣伏以車服之制  
並示等威著在典章所宜遵守近者班行之士官位  
已高或以散冗自謙或以簡便為意率相倣倣不置  
引馬街衢之內品秩莫分事涉因循頗乖典故其文



武常參官起今已後並據品秩准例置引馬其有合  
置不置許臣司糾舉罰一月俸料如違犯不已請具  
奏聞庶存制度用表官榮

唐會要  
六十二

常參官兼憲官序立依前遵守奏

准元和元年四月勅常參官兼御史大夫中丞立在本品同類官之上自後尚書諸司侍郎兼憲官與左右丞不常並置至於序立或有所疑臣伏請依前遵守永爲定制

唐會要

紇干泉

泉會昌元年爲庫部郎中知制誥官至嶺南節度使

五品以上犯贓賜死于家奏

准刑部奏犯贓官五品以上合抵死刑請準獄官令賜死于家者伏請永爲定式

唐會要  
三十九

孔溫業

溫業字遜志擢進士第會昌三年爲中書舍人大中時爲吏部侍郎後終太子賓客

李紳拜相制

門下興化致理必資作礪之功納誨弼違實賴將明之効苟非材標人傑道茂時宗蘊經濟之宏規積巖廊之素望則何以光我注意允于具瞻其惟至公式



舉成命淮南節度副大使知節度事管內營田觀察  
處置等使銀青光祿大夫檢校尚書左僕射兼揚州  
大都督府長史御史大夫上柱國贊皇縣開國男食  
邑三百戶李紳氣稟清剛體含冲用抱金石之正性  
挺松桂之貞姿識達古今慮周微隱詞源濬發洞學  
海之波瀾智刃高揮森武庫之矛戟中立不倚方嚴  
寡徒長慶一朝委遇斯極入參禁密出惣紀綱王猷  
多潤色之能邦憲著肅清之稱洎領版圖之任尤彰  
均節之宜而又寵辱靡驚得喪齊致河洛留神明之  
政浚郊恢將帥之謀威令播於軍戎豪黠屏跡惠化

洽於封部疲羸息肩俗口阜安人知禮義日者疇其  
高第換彼雄藩當淮海之要衝控舟車之都會風望  
益峻僉諧莫踰朕虔恭寶圖夢寐良輔爰膺審像果  
副虛求爾宜踐台席之崇嚴司中樞之密勿外以底  
綏華夏內以勤郵黎元視同列猶填筮期致君如魚  
水無使仲山補袞獨見美於周詩汲黯匡時常推高  
於漢史祇率訓典往惟戒哉可守中書侍郎同中書  
門下平章事散官勳封如故主者施行

王暉玉  
堂嘉話

陳夷行

全唐文七百四十五有傳



卷三十一  
七  
僕射上儀依三公奏  
臣等伏尋禮令並無僕射上日受京四品官拜儀注  
近年禮變多傳舊例省司四品官自左右丞部侍郎  
御史中丞皆羅拜階下以爲隔品致敬按諸禮致敬  
是先拜後拜之儀非受拜之謂又准禮皇太子初見  
上臺羣官卽行致敬之禮羣官先拜後答拜蓋以尊  
無二上禮須避嫌僕射與四品官並列朝班比肩事  
主豈宜務修僭越獨事優崇況事有應變從權禮有  
沿革損益受拜旣無根據隨俗則亂憲章臣等嘗見  
故吏部尙書鄭餘慶議僕射上日儀制不與隔品官

抗禮其時竇易直爲御史中丞奏非鄭餘慶所議及  
易直爲僕射貪榮近利忘棄前志羣情鄙之在列有  
拂衣而請告者臣等過蒙寵異擢任師長不願失禮  
取諄於時臣等又按禮記云大夫士非見國君無不  
答拜又曰君子士不答拜今僕射不答拜是臣其百  
僚傳爲故事何所取法復准開元元年改左右僕射  
爲左右丞相位次三公三公答拜而僕射受之固非  
宜也臣等上日伏請依三公上儀垂爲定制如蒙聽  
允望令所司約此撰儀注

唐會要  
五十七

歸融



全唐文七百四十七有傳

皇帝降服以日易月奏

伏觀義安殿皇太后遺令皇帝三日不聽政十三日  
 小祥二十五日大祥二十七日釋服者皇帝遵奉遺  
 旨將欲施行臣等商量事貴得中禮從順變伏以宣  
 懿皇太后常奉太皇太后之命追尊徽名祔配廟室  
 今之議禮合有等衰伏請皇帝降服期行以日易月  
 之制十三日釋服其內外臣寮亦請以此除釋至營  
 奉陵寢制度法物即請准舊例更無降制

唐會要  
三十八

殷侗

全唐文七百五十七有傳

請給河北兩州耕牛奏

當管河北兩州百姓耕牛見管戶一萬三千六百九  
 十四除老弱單獨外其間大半力堪營種去年緣無  
 耕牛百姓掘草根充糧一年虛過飢餓相繼轉死道  
 路臣去年躬親勸責酌量人力於一萬三千戶內每  
 戶請牛一具納絹綾五疋計三萬疋餘二千戶不得  
 牛營田不敢不奏

冊府五  
百三

州縣留放五員奏

管內州縣官大半勾當留在京師職掌當道兩稅外



又度支米穀見在官為納者今請下有司留放五員  
唐會要七十八

改建陵等四縣名奏

當管縣名與陵號同及與諸州縣名同總四縣一縣  
與肅宗陵號同桂州建陵縣今按圖經牒有脩仁鄉  
伏請改為脩仁縣永豐縣與信州永豐縣同按圖經  
縣下有豐水請改為豐水縣富州開江縣與開州開  
江縣同按圖經江係馬援所開請改為馬江縣唐州  
平原縣與德州平原縣同按圖經縣下有思和水請  
改為思和縣  
唐會要七十一

李景讓

全唐文七百六十三有傳

請升代宗以下八廟奏

穆宗敬宗文宗武宗四廟當遷出且穆宗是陛下兄  
敬宗以下是猶子陛下拜兄尚可拜姪可乎使陛下  
不得親事七廟宜升代宗以下八廟以正三昭三穆  
之序  
唐會要十六

諫宣宗為鄭光輟朝疏

按此文見舊唐書李景讓傳今存其目文不

錄



杜審權

審權字殷衡官至同中書門下平章卒諡德

授唐技虔州刺史裴紳申州刺史制

按此制東觀奏記云舍人杜德公之詞也今存其目文已見全唐文七十九卷

裴素

全唐文七百六十四有傳

明日帖

裴素制誥書寶歷元年楊嗣復相公下及第更不知聞是何薄情也明日為吾人請假一日具空繪祇候

望捨却他事早見訪也更無人惟有崔十學士此走狀不宣素再拜二十一日官郎中使君閣下二日寶真齋法

贊書

魏暮

全唐文七百六十六有傳

權放一兩月朝參奏

准兵部吏部禮部三司尚書侍郎等官一十三員主舉選試五箇月不朝參近已條流聞奏訖奏勅前後勅文處分有司不合妄更奏論准貞元十二年元和四年彈奏前件三司除試人及入宿外並不合不朝



參勅文曾未經年三司復此論奏今具前後勅文如  
前勅者本是五箇月不朝今許不過一兩月奏不權  
放必恐擁滯准兵部選事勞逸尤與吏部不同選限  
內遇公事繁併日任具事由牒臺尋常不在放朝參  
限唐會要  
二十四

李商隱

全唐文七百七十一有傳

賦三怪物

其一物曰臣姓猾狐氏帝名臣曰巧彰字臣曰九規  
而官臣爲佞魑焉佞魑之狀領佩水漩手貫風輪其

能以烏爲鶴以鼠爲虎以蚩尤爲誠臣以其工爲賢  
主以夏姬爲廉以祝駝爲魯誦節義于寒泥贊韶曼  
于嫫母其一物曰臣姓潛弩氏帝名臣曰攜人字臣  
曰銜骨而官臣爲讒醜焉讒醜之狀能使親爲疏同  
爲殊使父贈其子妻羹其夫又持一物狀若豐石得  
人一惡乃劓乃刻又持一物大如長篲得人一善掃  
掠葢蔽諂啼僞泣以就其事其一物曰臣姓狼浮氏  
帝名臣曰欲得字臣曰善覆而官臣爲貪魃焉貪魃  
之狀頂有千眼亦有千口鼠牙蠶喙通臂眾手常居  
于倉亦居于囊頰鉤骨箕環聯琅璫或時敗累囚于



牢狴拳枯屨校藜棘死灰僥倖得釋他日復為漁樵閒話

薛逢

全唐文七百七十六有傳

畫像自贊

壯哉薛逢長七尺五寸手把金錐鑿開混沌南部新書

段成式

全唐文七百八十七有傳

金剛經鳩異序

貞元十七年先君自荆入蜀應章南康辟命泊章之暮年為賊闢讒構遂攝尉靈池縣章尋薨賊闢知留

後先君舊與闢不合聞之連夜離縣至城東門闢尋有帖不令諸縣官離縣其夕陰風及返出郭二里見火兩炬夾道百步為導初意縣吏迎候且怪其不前高下遠近不差欲及縣郭方滅及問縣吏尙未知府帖也時先君念金剛經已五六年數無虛日信乎至誠必感有感必應向之導火乃經所著迹也後闢逆節漸露詔以袁公滋為節度使成式再從叔少從軍知左營事懼及禍與監軍定計以蠟丸帛書通謀于袁事旋發悉為魚肉賊謂先君知其謀於一時先君念經夜久不覺困寐門戶悉閉忽覺聞開戶而入言



不畏者再三若物投案曝然有聲驚起之際言猶在  
耳顧視左右吏僕皆睡俾燭樺四索初無所見向之  
闕局已開闢矣先君受持此經十餘萬遍徵應事孔  
著成式近觀晉宋已來時人咸著傳記彰明其事又  
先命受持講解有唐已來金綱經靈驗記三卷成式  
當奉先命受持講解太和二年於揚州僧栖簡處聽  
平消御注一遍六年於荊州僧靖奢處聽大雲疏一  
遍開成元年於上都懷楚法師處聽青龍疏一遍復  
日念書寫猶希傳照罔極盡形流通撫拾遺逸以備  
闕佛事號金剛經鳩異

酉陽雜俎

連珠

竊以銅街麗人恨塵泥之將隔石室素女怨仙俗之  
易分因知三鳥孤鸞從來要匹金雞玉鵠不願成羣  
其二

名比大喬怨佳期之未卜居連小市恨的信之難移  
因知愁逼夜長斜漢回而脉脉寒侵夢淺行雲去以  
遲遲

湘烟錄

先天幘讚 聯句

觀音化身厥形孔惟胞腦淫厲眾魔膜拜 張善繼 指夢  
鴻紛榜列區界其事明張何不可解 段柯古 閻河德川



大士先天眾像參羅噉噉田田鄭夢復百億花發百千

燈然膠如絡繹浩汗連綿善繼焰摩界戚洛迦苦霽正

念歸依眾皆如筆柯戾滓可汰癡膜可蛻稽古如空

眸容若睇善繼闡提黑尿靚而面之寸念不生未遇乎

而柯古上

答温飛卿書

昨更拾從土黑聲之餘自謂無遺策矣但愧井畫尙  
猶自恃醯雞未知大全忽奉毫白復新耳目重耳誤  
徹謬設生慙張奐致渝研味難盡詎同王遠術士題  
字入木班孟仙人噴書竟紙雖趙壹非草數丸志徵

汲媛餉夫十螺未說肝膽將破輸答已疲有力負之

更遲承問成式狀文房四譜

按此文據足本文房四譜錄

劉濛

全唐文七百九十一有傳

大理寺壁重寫律令奏

准文明元年四月勅律令格式為政之先有類準繩  
不可乖越如聞內外官寮多不習律退食之暇各宜  
尋覽仍以當司格式書于廳之壁俯仰觀瞻免使遺  
忘今以年代遐曠屋壁改移文字不脩瞻仰無所就



中大理寺評斷之司尤為要切臣已于本寺廳粉壁重寫律令格式唐會要六十六

王鐸

全唐文七百九十三有傳

自請督師奏

臣忝宰執之長在朝不足分陛下之憂願自帥諸軍盪滌羣寇唐會要七十八

唐文拾遺卷之三十一

榮祿大夫三品頂戴前分巡廣東高廉道加四級臣陸心源輯

陳寬

全唐文七百九十三有傳

再建圓覺塔誌

案梁武帝銘大師碑大師大同二年示終於洛州遺塔於□坂卽茲塔也司徒中書令汾陽王郭子儀復東京之明年抗表乞大師謚代宗皇帝謚曰圓覺名其塔曰空觀大師名達摩西域人也梁天監中自五天來昭昏轍荒鉞析缺□造□者識羈縻之醜落空





寂者知凝滯之非指迷轅於炳直之途揭惠旭於幽  
夷之表分別邪正開□□□使羣流缺四瀆而趨海  
也□本宗大聖所付至支那□□上乘第一祖至若  
往來之有無地位之高下非吾輩所得言焉過梁而  
徂及魏而止繫□遇缺三行葳緣□則遷豈墮諸數  
道且不住跡其可留取者自言我則何有熊耳山下  
一塔巋然骸葬形遊文詳於梁武靈泉瑞木表□於  
汾陽月闕其圓天之道也武宗皇帝謂真諦不可以  
相取密跡不可以像設徒使動盪清靜泉藪昏晦會  
昌癸亥歲遂詔廢釋氏□是率土□廟鞠為丘阜大

師銘誌亦隨湮滅碧空鐘梵與霜露而俱銷金地松  
缺三棘而無□今上即位即日牽復大中庚午歲八  
月十三日詔河南尹河東公再建斯塔今擇僧有大  
德可用擬大師者俾宰之洛陽僧與軒冕之士累百  
同舉手而偈曰大德僧審元其人也河東公賚詔書  
詣龍門以天子意起之於是元公拄錫至山下不言  
而人化無幾而塔成雲□矗立忽若疊巘匠石覃思  
琢珉就雕彼育□鬼功多寶踊□未獨多也分高中  
岳鼎足二陵浩劫未灰無以見毀大唐大中七年歲  
在癸酉正月五日穎川陳寬誌石



鄒敦愿

敦愿大中時魯郡人

唐故隴西董氏內表弟墓誌銘 并序

董氏其先隴西人也當春秋孔聖有歎古之良史也  
卽狐公之遠祖哉襲于漢相垂惟三餘名遂史冊列  
傳無代不書略而引之不復廣述曾祖芳祖彥璧考  
諱悅並有令名於當時其形狀人物備乎家傳不可  
覩縷而鐫先舅母廣平宋氏出自二男弟處其季也  
弟諱惟靖字安眾立性恬和爲人謙退交不擾雜用  
晦而明運泉貨以樂業子孫崇釋宗以益景福天胡

不愁年始知非有七歲染疾蒼而卒終嗚呼貞元十  
二齡丙子歲踵困敦生於江陽縣仁風里之私第大  
中六稔壬申歲當涖灘殞于江都縣贊賢里之寢舍  
也娶樂安任氏幼有婦德□□長繼移天之義晝哭  
聲咽灑淚漣漣鞠育四男並天假秀異長曰宗奭恭  
事伯父掌握格律舉直措諸巨細無私繁之是賴次  
男曰宗英次男曰宗璵季子曰宗興並幹父之用譽  
長兄惟竦顯居要職管內都勾友于急難如鵲鴿之  
孤翥原野飛□血淚潛然以營葬事宗奭等罹此苴  
疚悶絕哀號恭承□□朝晡無闕於其年六月十九



日克期于先考塋側域內以□神魂焉嗚呼內外兄弟能有幾人先後之間余亦相次恐他□地變拔淚直鐫其銘曰

嗚呼董弟先聖枝裏洎襲于唐甲子相繼不聞久□忽訃斯斃萋萋正華霜凋其棟暉暉強柯痛爾先□余忝內外豈不悲涕永捐骨肉長乖人世龜筮茲□□就立座□列松檟新墳剏製四子號天泉局永□  
續語堂碑錄

劉南仲

南仲大中時鄉貢進士節度隨軍

唐故馮府君墓誌銘 并序

府君諱廣清字元濟本姬周之盛裔後分望於長樂郡先祖事楚爲台鼎事漢爲大樹曾門皇諱□字□祖門皇諱□字□累授品位列郡爲郎枝葉芬敷散於海內從文及武光蔭門闈如鳳超騰彩耀雲路惟府君溫潤從性信義在心行禮則於故交布周旋於軍府去長慶之初廉使烏公擁旄橫海察其忠孝悉其功勞累遷職爲十將公稟荆玉而明白同月桂以芳香志好外書心崇內典不昧薰茹長持藏經皆以手書讀念川注身卽上事薤鉞心且懸於釋門比蓮



花之相以清淨爲根苗若金石之原以堅貞爲道本  
常得眾列高仰上土欽風爰至于今善名不朽豈爲  
暴徒逆命結禍亂天上縱兇牋下染君子烈火焚野  
災及雲蘿雷電震空惡盈松竹府君時爲將領攸適  
莫知時享年六十有二夫人穎川韓氏禮儀婦德齊  
於敬姜訓子擇隣同於孟母四德之風尙在三從之  
教儼存豈期壽命不遐幽冥去速時年世有三而終  
於夫之故園一男五歲一女二齡府君愍覲兒女早  
失慈親再婚彭城曹氏撫養偏露過於己生哀念恩  
深並已成長男繼宗天授聰穎文藻日新入事旌旄

便蒙駟策授義昌軍節度使官婚隴西董氏男一  
襁褓女二幼冲女十五娘適於王氏曹氏時年七十  
有五以大中元年九月三十日而終於滄州城內明  
經坊之寢位嗚呼婦德聲在儀質沉泉日月慘傷悲  
助荼苦忍以年代遐遠遷葬漸遙遂以其年丁卯十  
二月壬辰下旬七日卜地於滄州清池縣西南十里  
成村爲塋域遠招亡父之靈魂來歸勝原之墳墓莫  
以逐勝他土神儀散遊此者是府君之故鄉祖父之  
郡邑速離他土來祔新塋邱隴永安封原不變恐後  
天地輪改海岳有移故製斯文鐫在貞石銘曰



人賢君子温潤容儀令望遠播芳名世知上事旄鉞  
忠孝不虧惟尊釋教讀念受持不食薰茹不飲醕醢  
習吉積善歸於釋師今擇勝原安製墳墓府君夫人  
同泉禮祔天地保慶山川長固明明壟月淮淮蕪露  
百櫃千松萬年衛護非見齋碑錄

孫治

治大中時鄉貢明經

唐故太原王府君墓誌 并序

公問望華顯盛德冠時故能繼祚無窮傳芳襲子  
子孫孫勿替賢哲缺約八字榮名□□□而入仕長□□

缺約四大中八年六月十日缺約十八十一缺約五

河陽缺約三河陽缺約五大中九年□月廿日缺約九

河陽□□□趙村之缺約十谷□□桑榆缺約十其

銘曰

帝王之喪缺十嗣孫忠孝國之利器缺八墓煙冪冪

壠樹蒼蒼以垂萬古斯缺三孟縣志

李翊

翊大中間鄉貢進士

唐湖州缺六故夫人墓誌銘 并序

夫人金氏諱淑□京兆人也幼有容止長能柔順姆



教婉婉織組組克脩女事秉箕執箠婦道□□始  
 其笄年珮玉待禮時處士馮君名湍長樂人也世代  
 儒雅弓裘靡湮知名是空高尚不仕聞夫人令淑以  
 羊鴈娶焉且其閨望齊徽姻榮並曜變彼慶善宜其  
 室家鸞鳴鳳和鳩虎叶□敬脩賓饋然薦鹽梅謹侍  
 舅姑謙恭娣姒肅□閨壺舉宗俾嘉訓育兒女咸就  
 婚適冀之偕壽歿而同塋無何天道踈鑿殞茲令德  
 夫人以大中十二年四月十四日逝于□□鄉周章  
 里私第享齡六十有九所育兒女六人長曰亮仲曰  
 集季曰彥竟能仁孝温清罔違恂恂里閭孰不欽仰

女三人二歸沈氏一適陸門夫人弃背之辰遠近奔  
 格擗踊□慟泣血絕漿鄰里哀之共脩糜飼□于人  
 生浮□諭之日及歲以年十二月十日宅兆叶吉乃  
 遷柩窆於縣西北野婁山馮氏祖墓附於先舅姑塋  
 域東南隅禮也至孝亮等慮時移世變邱墟或湮俾  
 刻貞石藏銘元宮銘曰

賢哉夫人從德終身肅肅容儀譽美親鄰俄然□□  
 奄謝青春卜宅安厝餘溪石濱鬱鬱佳城依依

白歲冥冥孤墳

古刻  
叢鈔

缺四  
字

按叢鈔是誌題鄉貢進士李翱書不著撰人談鑰



吳興志金氏墓銘在墨妙亭鄉貢進士李翊述并書習之於元和初爲國子博士不應五十餘年後反稱鄉貢進士其爲翊撰無疑

令狐專

專大中時人

唐故上都唐安寺外臨壇律大德比正尼廣惠

塔銘 并序

維像教東度秘壘南翻立元云吾師竺乾宣尼稱西方有聖厥後感夢孝明漸於中國菩提達摩降及大照禪師七葉相承謂之七祖心印傳示爲最上乘羣

生以癡蓋愛網纏覆身宅口以慧炬燭之慈航濟之卽皆蹈昏溺之中迷方便之路矣於戲文殊口口金粟來儀窮象譯之微言罄龍宮之奧典卽我唐安大德其人也大德諱廣惠俗姓韋氏漢丞相之遺祉周司空之遠孫地承華緒門藉清流虛根夙殖道性天授積金翠之莫飾視葷腴而不味於是分瓶口頂染法壞衣奉乾越之眞諦識楞伽之要義賓波羅窟深入禪菁阿耨達池恆藏戒水傍灑甘露俛導蒙塵運智慧之妙其動也雲舒曾漢了般若之性其息也月鑒澄泉帝口口徒皆以宗師敬受初法我皇十年以



名臘隆抗克外臨壇大德德彌高而身彌遜聲愈廣而志愈冲負笈執經扣林者請益如市無明有漏傳心印者皆脫其網豈謂毗城示老雪山現疾雖菩薩之善本生沒是常而金剛之力堅持壞以太中十三年夏五月廿六日寂然入滅報齡五十七僧臘世八弟子性通等號奉衣履如將復生以其年六月十八日幢蓋香花遷座於韋曲之右嗚呼如來留影之壁石室空存舍利全身之函珠臺永闕專微眇凡品因緣甚親嘗蒙引論人天粗探真覺承筵禮肩繞玉之師子出躡入淨同之蓮花追荷法誘爰

薦詞慙非陸氏之文終謝蔡侯之健筆銘曰  
四流易染萬類難化世同驚飈色如奔馬非習調御孰明般若非習能行甯喜捨生既不可滅亦不空無去無來大觀體同至寶深嘗慧光不息松塔新成  
秦北後天地不泯者惟師之德石刻

劉景夫

景夫大中時人

唐故正議大夫行內侍省內府局丞員外置同  
正員上柱國太原縣開國男食邑三百戶賜  
緋魚袋王公墓誌銘 并序



公諱守琦父皇任朝散大夫充內酒坊使諱意通之  
第九子也公早朝禁掖旋授勗恩配賢父天實遇慈  
吳訓以文藝卓以詩筆教以溫常誠以廉克仁德播  
於流譽特選名於肘掖恪恪奉主孜孜在家貞清絕  
邁於古賢礪聽全逾於往哲斯可爲天之祐也故得  
常居寵祿朱紱銀光握恩不榭於先宗煥彩實暉於  
後嗣貞元十二祀入仕大中三載退歸私第因寢疾  
崩於歲十二月十五日緣久居崇祿先塋稍隘爰於  
舊墳西南隅剏建斯塋也伏以先墳高聳碑秀峨峨  
族裔具書此不列之公先夫人張氏早喪附在大塋

嗣子四人長曰從祐邁而往逝亦附大塋今夫人謝  
氏追念前恩怨嗟煢後哀慟過於斑家調訓同於孟  
母今至孝男允實次曰從盈又次曰從泰等嗷嗷血  
淚逾甚高柴啓侍晨夕殊邁曾哲生事已畢葬事將  
塋宅兆吉晨用刻大中四年正月廿三日禮葬鄉曰  
崇義村号南姚土事銘詞因斯建也銘曰

彤彤王公穆穆和恭侍親以孝事君以忠四科畢備  
書劔全功能章禮樂能揚國風少承光寵暮乃將退  
居上共宗居下共愛身歿名章魂消譽在劔鏡人仁  
孰不欽賚

石刻



康季榮

季榮大中時徐泗節度使

旌周小兒孝行奏

據濠州刺史劉彥謀狀定遠縣百姓周裕女小兒年九歲今年七月六日為父患割左股上肉一寸三分不落瘡長一寸四分收得血半斤父和羹喫後二十九日載割股上已落肉與父喫其周裕至閏七月十二日身死至二十五日埋葬訖其女小兒於墓側不歸縣司與立草庵一所伏以寄分廉察地列山河獲當盛明親逢大孝伏請宣付史館並賜旌表門閭

冊府

尹震鐸

震鐸大中時鄉貢進士

唐故宣義郎行內侍省內僕局丞員外置正員

上柱國李府君墓誌銘

并序

海波動搖珠璣先沉颶風暴起茂葉前落秀木先折甘井先竭將徵其物以類於人不幸短命少年身歿者痛乎府君姓李名從証漢將李廣之苗裔歷魏晉宋齊梁陳隋唐于今一千年餘名氏傳於後移族開內高陵縣曾祖諱温傲時不仕東臯自閑名利去懷平揖卿士祖諱進超興元監軍賜緋魚袋烈孝諱行



邕磔立偉材英賢間出器冠成字名揚者德有命子  
三人長曰忠義故汴州監軍賜紫金魚袋次曰從誠  
階朝散大夫行內侍省掖庭局宮教博士上柱國公  
第三子也公多藝不羣聰明天折博讀經書偏精左  
氏春秋傳學晉右將軍書墨妙筆功時稱能者通老  
氏六博周人十二碁中得其一可以對人而閱視所  
重者重於道所耽者耽於琴德輶如毛藝成羽翼獲  
右神策軍護軍中尉劉□慕而取之置之於肘腋知  
賢眷注薦用親於閤門公跂足□拳揮管灑翰立書  
奏傍點畫無缺未逾數歲出入殿庭善好和光明時

濟會厥初入仕事武宗皇帝授宣義郎行內侍省內  
僕局丞員外置同正員上柱國身衣綠綬面對天聽  
復遇方今聖皇帝受命銜恩爲主心腹直道事君結  
誠許國是知善人脩短聰明天折身染于疾漸寢于  
榻虛徵百藥蟾月三缺心神不惑知時而終以大中  
四年十一月十六日終于廣化里私第昔禮婚王氏  
比有所娶今無其家年少失倚□哭爲業有命子一  
人曰敬融託長富門未任時務以喪事辨於仲伯從  
誠堂□敬實偕日簪筮龜卜而不吉曰吉月兆而不  
利遂不入於大塋以大中五年正月廿三日葬于先



瑩碑堂之東地卽京兆府萬年縣澹川鄉上傳村置其墳焉公從兄從誠會震鐸於闕下情深於與遊請菲薄之詞遂握管搜思銘曰

瑞雲瞥見散而成空念人在世與此略同水有迴波命無重生名姓榮貴如風響聲當官成客入土是家寃不長壽少年可嗟影滅魂消藝隨身去深壙塋床永爲歸處石刻

李柔

柔大中時人

明州奉化縣岳林寺塔銘 并序

大中十年歲□□子正□□己丑廿日甲子建新□者□□道宗施主□□弟子傅二娘□西方聖人教傳中國作万方□救之途□□無住之相卽不以執著爲□□小乘之初開□在於瞻仰故□子□□尚下缺證果况埏埴爲□缺轟缺遂使缺大利缺□□所說凡在初□缺□□哉□師□□之缺□□日月電過□□缺□□銘曰

韋博

博字公業京兆萬年人第進士遷殿中侍御史開成



中拜河東節度判官官至檢校禮部尚書

唐故光祿大夫守太子太傅致仕上柱國彭城

郡開國公食邑三千戶贈司徒劉公神道碑

銘并序

公諱沔字子淮其先彭城人世為將習孫吳兵法皆

以騎射善開石聞開元天寶缺功名缺曾祖玄銀青

光祿大夫檢校太子賓客利州長史兼監察御史生

王父嵩銀青光祿大夫檢校司空□□□刺史兼

侍御史缺不甚顯忠厚積慶必大其胤是生皇考奉

天定難功臣興元元從驃騎大將軍行左驍騎衛大

將軍缺時□屢起於輦下嘯呼叛寇狂刀指闕六軍

無素大駕西幸僕射公與侍中缺德宗皇帝于奉天

縣分守壁壘力戰前後凡數十合賊不敢近缺寶橐

中居僕射喪哭無時親戚僕使□所□外餘財封植

松栢無所□制□杖劔北遊缺希朝希朝與語□□

□立署衙門將□□□客公佩刀侍堦下希朝目

之使與坐指其眾曰此子他年必有吾坐公戰竦拜

謝缺大夫檢校左散騎常侍兼將軍知軍事公善射

能擊毬與其輩角於公場數勝羣輩企羨屬缺前後

高下太和元年□月十七日遷大將軍依前知軍事



嚴慎簡重恩威洽肅動靜規矩口皆 缺 九月十七日  
 以北地口急藉公威聲詔守本官移理振武涇人惜  
 其去閉壘留乞公曰 缺 稍相解諭會傳鼓口自闕來  
 公給之迎迓引眾出前揖其使遂鞭馳數十里入長  
 武城 缺 戰卒故士卒樂其公善緝破碎不事口長無  
 虛費誇飾故廩盈而庫實人閑而力逸 缺 文宗皇帝  
 嘉能軍詔曰卿材膺將帥道茂公忠立城堡於要衝  
 禦番戎 缺 支持不更論請 缺 業而出羣何能臻此其  
 年九月十七日加戶部尚書五年三月十六日檢校  
 左僕射其年迴紇 缺 領天德軍與振武之師 缺 賜繒

錦銀綵監軍使劉元政大將百姓僧道耆老蕃部首  
 領具公休績聞於朝請建碑紀公抗章固讓無勞 缺  
 芳藹而遺焉會昌二年春迴紇大入天德口太原振  
 武北界詔兵部郎中李拭往視經略器備城戍且觀  
 其部將之能否使還實辭唯公可任三月廿七日以  
 本官除河東節度使三月迴紇寇雲州六月出太原  
 之師九月判兼充招撫迴紇使其時徵四方之師已  
 集命公指揮進退遂屯于鴈門關斬雲州口將七  
 人以徇然後分部據險秣馬教射積食口器練材傑  
 第猛力程其材而任之頻詔促戰公上表曰不及獻



卷三十一  
五  
歲之初必見誅□之効朝議不聽責戰益速□筭□  
□堅正不撓其年終移軍天甯□移雲州得謀者曰  
迴紇已于正月一日將□當晨謁都護府我併兵力  
攻必得其城食其粟陰山漠南舊吾土可以爭衡取  
安之道□□召并州刺史石雄馬步都知兵馬使王  
逢遊□先鋒使劉万除令之曰與爾□一万至安眾  
寨遇寇當戰復須以捷報如乘其虛卽盡虜妻男女  
牛馬倍道歸我比虜還已失旗張吾遣士登城呼之  
可一麾來降時三年正月九日矣至十一日夜□□  
於殺胡嶺大破之斬首三千級得太和公主還于上

京降特勤王子二十一人□汗達干將軍世餘人首  
領人俘纍四千餘眾牛馬駝羊万計犒旋加檢校司  
空物議賞未直其功再加金紫光祿大夫仍賜一子  
正員八品官軍還次代州時歸義軍迴紇三千餘人  
并首領卅三人隸食諸道天子新與其號而又恃思  
忠宿衛之寵不受詔曰我虜也死於此足矣南州不  
復往夜大呼連營據呼施河叛公曰夫權貴於合道  
是宜誅之不俟詔旨奏還果契上意軍還河東六月  
又詔領師南討澤潞屯榆杜歸百姓男女五百餘口  
得歸義將□及健卒送闕下公以劉稹□□爲



隣封從諫每欲濟師助我今諸軍或不捷必貽論指  
目禍基此矣上疏切言移滑州節度使守本官會昌  
四年二月廿五日以萬善之戰克詔除河東節度  
使領滑師三千口口萬善聲勢實欲公歸焉自河陽  
又遷光祿大夫檢校司空鎮許昌詔將到公曰吾聞  
無德而祿又無基而厚墉不亡何待稱病堅口夙恙  
亟聞于朝口口之知口口口歎惜喧問相續除太子  
太保以不任朝謝報復除太子太保致仕又遷太子  
太傅辭榮知止或筋力不任持年而請公口齡六十  
持節三鎮以全力盛功高位口時勳名無驕德色日

以盈滿是懼退休爲切二百年強寇一旦廓清北方  
無虞胡馬不牧閉室私第不妄遊止出按別墅素衣  
小馬從者數人道遇口口下聞風口退優遊自遂不  
悲不戚以大中二年十一月十日遘疾薨于昇平里  
享年六十五天子悼痛輟朝朝缺公兩子缺勇武毅  
爲右神策軍押衙銀青光祿大夫檢校太子詹事前  
蔣王府長史兼侍御史繼其家聲不隕先業幼從口  
前左鎮軍騎將缺兼侍御史節缺公之風可濟秩遺  
口及焉博自殿中侍御史改檢校司封員外郎佐公  
幕于太原從行營于雲州周旋始終缺不刻缺



上旄頭耀芒爪牙用張繫公而功孰神可當厥維勾  
奴軼陸跳梁在昔不馴北方稱強既□□授如缺無  
缺軌□伏藏界際萬里野寂三光休烈魏魏歉若無  
有思愧寵踰功懿祿厚二疏繫思五湖在慮不盈不  
傾石

宋玕

玕大中時試太常寺協律郎

故忠武軍節度兵馬使朝請郎試左金吾衛兵

曹參軍上柱國朱公墓誌

有唐垂理天下二百世四年闕四歲庚午夏六月十

一日忠武軍節度兵馬使朱公時卒矣嗚呼闕約社  
知之者絕絃是以賢哉斯人若平生之好爲歿後之  
傷玕濫學□□切慕仁里將綴其事實因而以叙之  
公諱萱字元茂其先出於吳郡公卽淮海之人也曾  
祖諱賓祖諱遷先君諱惟前代標其素行後來襲其  
清風閑居究老聃五千之經處士修仲尼三百之禮  
信有譽於鄉曲福將及其子孫公性剛毅心特達早  
從職於鹽鐵之務嘗奉公於府庫之司善計絲毫成  
資憶兆又居行列之首亦專饋運之先在今之徒莫  
能繼踵平昔之業因由累功復迺志樂轅門藝合軍



府佐元戎靜其藩鎮事方伯美於黔黎雖未親隨征  
 軒効其駟殿或若屢從使騎知其否臧奈何懷雄略  
 期報國而未就甄昇韞多謀以成名而口嬰口口彼  
 吳穹不愁遺良士始春秋五十三云亡于揚州之邑  
 海陵之第闕四字楊氏對孤影恨絲蘿無託處空閨悲  
 琴瑟何乖晝哭其禮可知朝闕約八字之賢者曷以出其  
 右哉有一子曰敬存以其繼續於先將闕八字長許嫁  
 東莞臧氏次適太原郭氏季許從隴西李氏皆孝闕約  
 字公卜葬以其秋九月八日壬午于邑之西原白路  
 里之禮也闕約十字峻為溟以深耕之以夷居之以聚將

期永歲斯以誌之固命闕約八字者之所作不文不飾無

以加之置諸埏埴而已矣詞云

上闕八字淑人楊名于淮泗晦跡于江濱遐邇嚮其德疏

昵依於仁闕約五字脩辭以潤身其生也顯于其榮其沒

也歸于其真惜哉弓闕約五字悲夫金玉瘞于荆藁刻茲

石將為不朽以傳乎千古

上闕四字辰楊氏以大中十三年十月八日合祔府君之

營禮也石刻

王頊

頊大中朝文林郎守蘇州海鹽縣主簿



唐故穎川陳夫人墓誌銘 并序

夫人穎川郡人也其源流枝裔系在家諜故可得而略焉曾祖遠皇左千牛衛長史祖琚皇申州羅山縣尉考脩皇宣州旌德縣尉五代祖以文學中策累資為長洲令其後子孫因家吳郡夫人旌德君之仲女也外祖順陽范公詢始以孝廉入仕多赴公侯延辟為巡察之職季年終於丹徒令其外族親戚世多卿相為侯伯者不可勝紀夫人少習詩禮長善筆扎自孩提至笄年不履堂闕其於針刀之功罔不盡妙予嚮其清規飽其懿淑遂因親友傳導願委禽焉及拜

其室觀其德果叶所聞余後琴瑟韻合閨門道光將期視子孫之盛保松筠之壽何期暫嬰微疾以至殂逝抑聞之古人曰皇天無親惟德是輔且夫人事親盡孝可侔於曾閔事夫執敬有類於恭姜孝敬之道既備可謂全其德也奈何不享其壽弃予先逝則天道輔德之言曷足憑乎然夫人在家有金玉之豐為婦享祿祿之盛則平生之分亦無恨矣所痛者以予天年未盡不得與良人偕死故於九原之東虛其左室俟予啓手足之晨從夫人禱於此也冀泉壤再合神魂相依夫人歸予八年生子二人長曰嚴七幼曰



印兒俱嬰孩然居喪號慟皆過毀瘠女二人亦幼稚晨暮哭泣如成人焉夫人年廿五大中十年二月廿一日寢疾終于海鹽縣之公署以其年十一月廿一日葬於蘇州長洲縣餘抗鄉石瀆南館墅村之原禮也嗚呼男未辨方女猶總角一旦弃去俾誰字之嗟乎日月有時痛傷無已銜哀識石以虞變遷銘曰於戲良人道光母儀事上以敬撫下惟慈溫恭可範閨門有規何啻不壽泉路永辭楚玉沉素妍芳墜枝皇天何罪邁我孤危慟哭總帳生平莫追流水凝咽松風助悲彭殤兮同趨此道泉壤兮與卿之期石刻

薛達

達大中時隴州防禦使秦州刺史

築定戎關奏

伏奉正月二十六日詔旨令臣築故關訖聞奏者伏以汧源西境切在故關昔有隄防殊無制置僻在重岡之上苟務高深今移要會之口實堪控扼舊絕泉井遠汲河流今則臨水挾山當川限谷危墻深塹克揚營壘之勢伏乞改爲定戎關關吏鈐轄往來臣當界又有南由路亦是要衝舊有水關亦請准前扼捉去正月二十七日起功今月十七日畢謹畫圖進上



唐會要  
八十六

鄭渥

渥大中時山南西道節度使

文川谷路斜谷路置驛奏

當道先准勅文新開文川谷路從靈泉驛至白雲驛  
共一十一所並每驛側近置私客館一所其應緣什  
物糧料遞乘並作大專知官及橋道等開修制置畢  
其斜谷路創置驛五所平州驛一所連雲驛一所松  
嶺驛一所靈谿驛一所鳳泉驛一所並已畢功訖  
冊府

韋損

損初名謹襄陽人武昌軍節度使檢校戶部尚書

請立私廟奏

四代祖湊開元中于上都立政坊立廟至建中四年  
亡失木主其廟屋及樹並在今臣官階至三品合立  
私廟祔享前件廟

唐會要  
十九

韋孺實

孺實太常寺主簿

議韋損立三世廟奏

准何修之禮問答云始安靖王廟東城事亂神主不  
存廢祠未久今欲造木主升祔于禮如何答曰新造



木主成便合奉迎入室當設酒脯之奠然後即安也  
 又准禮文武官二品以上祠四廟五品以上祠三廟  
 今韋尚書官至三品自合得立三廟緣四代祖河東  
 節度使先立私廟太師已曾祠廟訖至建中四年失  
 木主自後子孫位卑其祠久廢今韋尚書官位三品  
 准祠祭令各立三廟即合祭太師中丞及使君三神  
 主便合營造廟宇以安木主今河東節度舊廟木主  
 亡失廟宇見存其河東節度是四代神祖不合更祭  
 今祠太師以下三神主于其廟在禮無嫌唐會要十九

李元中

元中咸通間人鄉貢進士

大唐幽州節度隨使押衙銀青光祿大夫檢校

國子祭酒太原王公夫人清河張氏墓誌

夫人姓自軒轅之弟子揮始造安實張羅網世掌中  
 其職遂為氏焉夫人家族奇常洪惟茂著精妙淑氣  
 稱善人寰奉養盡心於晨堂婦道飽恭於大族可謂  
 金玉顯明禮樂嘉世惟孝其德惟口其仁豎立規風  
 溫顏內外實可比於行狀也祖万友父少清魯儒相  
 襲業善何曾不仕王庭耿恣優逸古今之有也于職  
 輪搖小焰劫促年光夫人無何以咸通四年正月廿



日寢疾至五月廿四日終于幽州幽都縣界勸利坊  
私弟享年六十有一嗚呼行路悼焉姻親感慟子孫  
泣血僉曰孝門夫人有子四人長曰弘泰見任雄武  
軍平地柵巡檢烽鋪大將遊擊將軍試左驍衛將軍  
文武全材君親選寄弓開落鷹詞逸橫科次曰弘雅  
次曰弘籍次曰弘楚咸著義方俱脩禮樂壯年當代  
名卽其成時謂曰弓裘不墜矣夫人以七月十三日  
禮葬于幽都縣界保大鄉樊村之原也嗚呼哀哉愴  
兮奄窆知白楊早落慮青松後彫代變人移紀之陵  
谷乃鏤其石保其始終銘曰

人寰何限兮流年光寘路何促兮空蒼蒼明月照墳  
兮下泉客春秋來去兮高白楊煙雲凝思兮埋古壟  
風光聲哀兮成慘傷陵谷變移兮朝與暮寂寞終天  
兮堪斷腸

石刻







